

LIGJ
Nr. 46/2018

**PËR KONTROLLIN SHTETËROR TË TRANSFERIMEVE NDËRKOMBËTARE TË
MALLRAVE USHTARAKE DHE TË ARTIKUJVE E TEKNOLOGJIVE ME
PËRDORIM TË DYFISHTË¹**

*(Ndryshuar me ligjet; nr. 90/2020, datë 9.7.2020; nr. 89/2024, datë 26.7.2024; nr. 29/2026,
datë 5.3.2026)*

(i përditësuar)

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

KREU I
DISPOZITA TË PËRGJITHSHME

Neni 1
Qëllimi

1. Qëllimi i këtij ligji është vendosja e kontrollit shtetëror mbi transferimin ndërkombëtar të mallrave ushtarake dhe të artikujve e teknologjive me përdorim të dyfishtë, për të siguruar mbrojtjen e interesave kombëtarë të Republikës së Shqipërisë, sigurinë dhe politikën e jashtme, kredibilitetin ndërkombëtar të saj dhe garantimin e respektimit të angazhimeve ndërkombëtare të Republikës së Shqipërisë në këtë fushë.

2. Ky ligj rregullon kontrollin shtetëror të transferimeve ndërkombëtare të mallrave ushtarake, artikujve dhe teknologjive me përdorim të dyfishtë, duke përfshirë kontrollin, para, gjatë dhe në zbatimin e licencave apo autorizimeve të eksportit, të eksportit të përkohshëm, të importit, të importit të përkohshëm, të tranzitit, të transshipit, të veprimtarisë ndërmjetësuese dhe të asistencës teknike.

Neni 2
Përkufizime

(Ndryshuar pikat 2, 9, 19, 20, 23, 24, togfjalësh në pikën 25 dhe pika 27, shtuar pikat 3/1, 9/1, 24/1 dhe 34, shfuqizuar shkronja “c” e pikës 16 dhe pika 22 me ligjin nr. 29/2026, datë 5.3.2026)

¹ “Ky ligj është përafëruar pjesërisht me Rregulloren e Këshillit (KE) nr. 428/2009, datë 5 maj 2009, “Mbi vendosjen e një regjimi komunitar për kontrollin e eksportit, transferimit, ndërmjetësimit dhe tranzitit të mallrave me përdorim të dyfishtë”, të ndryshuar. Numri CELEX 32009R0428, Fletorja Zyrtare e Bashkimit Evropian, seria L, nr. 134, datë 29.5.2009, faqe 1–269”.

Në këtë ligj termat e mëposhtëm kanë këto kuptime:

1. “Transferim ndërkombëtar i mallrave” është eksporti, eksporti i përkohshëm, importi, importi i përkohshëm, riekporti, ndërmjetësimi, tranziti ose transshipi nëpër territorin e Republikës së Shqipërisë dhe çdo transferim tjetër jashtë apo brenda këtij territori, në të cilën janë përfshirë subjekte të ndryshme dhe mallrat e kontrolluara.

2. “Eksport” është:

a) regjimi doganor i eksportit sipas kuptimit të nenit 241 të Kodit Doganor të Republikës së Shqipërisë;

b) riekporti sipas kuptimit të nenit 242 të Kodit Doganor të Republikës së Shqipërisë; riekporti mund të bëhet pasi mallrat joshqiptare kanë qenë nën magazinimin doganor, përpunimin aktiv, lejimin e përkohshëm në një zonë të lirë ose magazinim të përkohshëm në kuptim të neneve 242 deri 246 të Kodit Doganor të Republikës së Shqipërisë;

c) regjimi i përpunimit pasiv sipas kuptimit të nenit 232 të Kodit Doganor të Republikës së Shqipërisë; ose

ç) transmetimi i programeve *software* apo i teknologjisë nëpërmjet medias elektronike, përfshirë nëpërmjet faksit, telefonit, postës elektronike ose çdo mjet tjetër elektronik, përfshirë bërjen të disponueshme të këtyre softeve dhe kësaj teknologjie, në formë elektronike, për personat juridikë dhe fizikë apo çdo partneritet jashtë territorit shqiptar ose për një person të huaj brenda territorit shqiptar, si dhe transmetimin gojor të teknologjisë, kur teknologjia përshkruhet përmes një mjeti të transmetimit zanor.

3. “Deklaratë eksporti” është akti, me anë të të cilit një person shpreh, në formë dhe mënyrë të parashikuar, vullnetin për të vendosur mallrat e kontrolluara në procedurë eksporti.

3/1. “Deklaratë përmbledhëse e daljes” sipas kuptimit të pikës 10 të nenit 6 të Kodit Doganor të Republikës së Shqipërisë.

4. “Deklaratë riekporti” është akti, me anë të të cilit një person shpreh, në formë dhe mënyrë të parashikuar, vullnetin për të nxjerrë mallrat të kontrolluara joshqiptare, me përjashtim të atyre të cilat janë nën një regjim zone të lirë ose magazinimi të përkohshëm, jashtë territorit doganor të Republikës së Shqipërisë.

5. “Eksportues” është:

a) çdo person fizik ose juridik, ose partneritet, në emër të të cilit paraqitet deklarata doganore e eksportit ose personi që në kohën kur pranohet deklarata ka kontratën me marrësin e ngarkesës në vendin e huaj dhe ka autoritetin që të vendosë për dërgimin e mallit jashtë territorit doganor të Shqipërisë. Nëse nuk është lidhur asnjë kontratë eksporti apo nëse mbajtësi i kontratës nuk vepron në emër të vetë atij, eksportues është personi që ka autoritetin të vendosë dërgimin e mallit jashtë territorit doganor të Shqipërisë;

b) çdo person fizik ose juridik, apo çdo partneritet që vendos të transmetojë apo të bëjë të disponueshme programe *software* apo teknologji përmes medias elektronike, përfshirë përmes faksit, telefonit, postës elektronike apo përmes çdo mjeti tjetër elektronik në një destinacion jashtë territorit shqiptar ose te një person i huaj që ndodhet në territorin shqiptar;

c) pala kontraktuese e vendosur në Shqipëri, e cila eksporton mallra të kontrolluara, sipas kontratës në të cilën është bazuar eksporti, në emër dhe për llogari të një personi të vendosur jashtë territorit shqiptar;

ç) çdo individ, i cili eksporton mallra të kontrolluara edhe kur këto mallra ndodhen në bagazhin personal të tij.

6. “Import” është:

a) një procedurë importi, në kuptim të Kodit Doganor të Republikës së Shqipërisë;

b) transmetimi i programeve *software* apo i teknologjisë përmes medias elektronike, përfshirë nëpërmjet faksit, telefonit, postës elektronike ose çdo mjeti tjetër elektronik për personat fizikë dhe juridikë, nga jashtë territorit shqiptar te një person apo subjekt brenda territorit shqiptar.

7. “Importues” është:

a) personi fizik apo juridik i vendosur në territorin e Republikës së Shqipërisë, në emër të të cilit bëhet një deklaratë importi ose një person që në kohën e dhënies së licencës ka nënshkruar kontratë me marrësin e mallrave brenda territorit doganor të Republikës së Shqipërisë;

b) personi i autorizuar që të marrë mallrat brenda territorit doganor të Republikës së Shqipërisë, nëse nuk ka pasur kontratë për eksportin apo nëse njëra nga palët në kontratë nuk vepron në emër të tij/saj;

c) çdo person, i cili ka të drejtën për të çliruar mallrat e kontrolluara në qarkullim të lirë brenda territorit të Republikës së Shqipërisë;

ç) çdo individ, i cili importon mallra të kontrolluara, edhe kur këto mallra ndodhen në bagazhin personal të tij.

8. “Deklaratë importi” është akti, me anë të të cilit një person shpreh, në formë dhe mënyrë të parashikuar, vullnetin për të vendosur mallrat e kontrolluara nën procedurë importi.

9. “Tranzit i mallrave me përdorim të dyfishtë” është transporti tokësor, detar, ajror dhe/ose transporti i kombinuar i mallrave në kuptim të Kodit Doganor të Shqipërisë, që hyjnë dhe kalojnë nëpërmjet territorit të Republikës së Shqipërisë, me destinacion një vend jashtë Shqipërisë, përfshirë artikujt që:

a) janë vënë në një procedurë tranziti të jashtme në përputhje me Kodin Doganor të Republikës së Shqipërisë;

b) janë transhipuar brenda ose eksportohen/rieksportohen drejtpërdrejt nga një zonë e lirë;

c) ndodhen të magazinuara përkohësisht dhe që rieksportohen drejtpërdrejt nga ambientet e magazinimit të përkohshëm;

ç) janë sjellë në territorin e Shqipërisë me të njëjtin mjet lundrimi apo fluturimi, që do t’i nxjerrë ato jashtë atij territori, pa i shkarkuar.

9/1. “Tranziti i mallrave ushtarake” është transporti rrugor, ujor, ajror dhe i kombinuar i armatimeve dhe i pajisjeve ushtarake, i cili hyn në territorin e Republikës së Shqipërisë, transportohet nëpërmjet tij (me ose pa transhipim) dhe largohet nga territori i Republikës së Shqipërisë.

10. “Transship” është transferimi/transbordimi i ngarkesës nga një mjet transporti te një tjetër për tranzit të mëtejshëm për të përfunduar udhëtimin dhe për ta transportuar ngarkesën në destinacionin e fundit të saj, pa ndryshuar pronësinë e mallrave.

11. “Personi përgjegjës për tranzitin” është:

a) personi fizik ose juridik, i cili vendos aktualisht për tranzitimin; ose

b) nëse ky person fizik apo juridik nuk mund të përcaktohet, përgjegjësi i tranzitit është personi fizik apo juridik, i cili përgjigjet për transportin.

12. “Eksport i përkohshëm i mallrave” konsiderohet lëvizja e mallrave të kontrolluara jashtë territorit doganor të Republikës së Shqipërisë, për t’u kthyer më vonë në të njëjtin territor.

13. “Import i përkohshëm i mallrave” konsiderohet lëvizja e mallrave nga një vend i huaj në territorin e Republikës së Shqipërisë, për t’u kthyer më vonë në vendin e nisjes.

14. “Embargo” (e plotë apo e pjesshme) konsiderohen masat ndaluese ose kufizimet e transferimeve ndërkombëtare të mallrave dhe të shërbimeve të kontrolluara te subjektet, personat apo shtetet, të cilat janë të vendosura nga një rezolutë detyruese e Këshillit të Sigurimit të Organizatës së Kombeve të Bashkuara, OSBE-ja, vendim i Këshillit apo rregullores së miratuar nga BE-ja, ose si

pasojë e vendimeve të marra sipas politikave të caktuara të Republikës së Shqipërisë.

15. “Mallra të kontrolluara” janë mallrat, përfshirë *software*-t dhe teknologjitë e renditura në listën e mallrave ushtarake dhe të artikujve me përdorim të dyfishtë, si dhe çdo artikull tjetër, në kuptim të nenit 11, të këtij ligji.

16. “Mallra ushtarake” janë:

- a) mallra që janë projektuar, zhvilluar, prodhuar, montuar apo janë modifikuar për përdorim ushtarak, përfshirë teknologjinë dhe *software*-t e lidhura me këto mallra;
- b) mallrat e specifikuar në listën e mallrave ushtarake; ose
- c) Shfuqizuar.

17. “Të dhëna teknike” janë projekte, plane, skica, skema, diagrame, modele, formula, specifikime, *software*, manuale dhe udhëzues, të printuara apo të ruajtura në një sistem rikuperimi, përfshirë atë elektronik.

18. “Asistencë teknike” është çdo udhëzim teknik lidhur me riparimin, zhvillimin, prodhimin, montimin, mirëmbajtjen dhe testimin e mallrave dhe të teknologjisë apo çdo asistencë tjetër teknike lidhur me këto mallra, ofruar në formën e udhëzimeve, trajnimeve, dhënies së njohurive dhe shërbimeve të konsulencës.

Asistenca teknike përfshin edhe udhëzimet e dhëna verbalisht apo me shkrim dhe kurset e trajnimit.

19. Ofrues i asistencës teknike” do të thotë:

- a) çdo person fizik ose juridik apo çdo partneritet, që ofron asistencë teknike nga territori i Republikës së Shqipërisë në drejtim të një vendi tjetër;
- b) çdo person fizik ose juridik apo çdo partneritet që është rezident ose i themeluar në territorin e Republikës së Shqipërisë, që ofron asistencë teknike për një banor rezident të një vendi të huaj, që ndodhet përkohësisht në territorin doganor të Republikës së Shqipërisë.”;
- c) çdo person fizik ose juridik apo çdo partneritet që është rezident ose i themeluar në territorin e Republikës së Shqipërisë, që ofron asistencë teknike brenda territorit të një vendi tjetër.

20 “Mallra me përdorim të dyfishtë” janë:

a) artikujt, përfshirë programe kompjuterike dhe teknologji, të cilat mund të përdoren për qëllime civile e ushtarake, dhe përfshijnë mallra që mund të përdoren për projektimin, zhvillimin, prodhimin ose përdorimin e armëve bërthamore, kimike ose biologjike apo të mjeteve për shpërndarjen e tyre, përfshirë të gjitha mallrat që mund të përdoren si për qëllime joshpërthyesë, ashtu edhe për të ndihmuar në çfarëdo mënyre në prodhimin e armëve bërthamore ose të pajisjeve të tjera shpërthyesë bërthamore;

b) artikujt e specifikuar në listën e mallrave me përdorim të dyfishtë.

21. “Përdorues i fundit” është:

a) personi fizik apo juridik, privat apo publik, që janë marrësit përfundimtarë të mallrave të kontrolluara;

b) personi fizik apo juridik, privat apo publik, që ka marrë asistencë teknike lidhur me mallrat e kontrolluara.

22. Shfuqizuar.

23. “Licencë individuale” është licenca e lëshuar nga Autoriteti i Kontrollit Shtetëror të Eksporteve për një eksportues të specifikuar, që autorizon një ose disa transferime ndërkombëtare të mallrave të kontrolluara drejt një përdoruesi përfundimtar apo marrësi në një vend të specifikuar dhe përfshin një apo më shumë mallra të kontrolluara.

24 “Licencë globale” është licenca e lëshuar nga Autoriteti i Kontrollit Shtetëror të Eksporteve për një eksportues të specifikuar në lidhje me një lloj apo një kategori të caktuar të

mallrave me përdorim të dyfishtë, e cila është e vlefshme për transferime ndërkombëtare të shumëfishta drejt një ose më shumë përdorues të fundit apo marrësish të specifikuar dhe/ose në një ose më shumë vende të specifikuara.

24/1. “Licencë për projekte të mëdha” është licenca individuale ose globale e lëshuar nga Autoriteti i Kontrollit Shtetëror të Eksporteve, e dhënë për një eksportues të specifikuar në lidhje me një lloj apo kategori të mallrave me përdorim të dyfishtë, e vlefshme për eksporte drejt një ose më shumë përdoruesve përfundimtarë të specifikuar në një ose më shumë vende të specifikuara për qëllimin e një projekti të madh të specifikuar.

25. “Licencë e përgjithshme” është licenca e lëshuar nga Autoriteti i Kontrollit Shtetëror të Eksporteve për të kryer një transferim ndërkombëtar të mallrave me përdorim të dyfishtë drejt disa vendeve të caktuara apo prej tyre, e përdorshme nga të gjithë personat juridikë apo fizikë që respektojnë kushtet dhe kërkesat për përdorim, të renditura në licencën e përgjithshme.

26. “Programi i përputhshmërisë së brendshme” janë mjetet dhe procedurat efektive të përshtatshme dhe proporcionale, duke përfshirë zhvillimin, zbatimin e politikave të standardizuara operative të përputhshmërisë, të procedurave, të standardeve të sjelljes, si dhe tërësia e masave mbrojtëse të zhvilluara nga eksportuesit dhe importuesit për të siguruar pajtueshmëri me dispozitat, me termat dhe kushtet e licencave të përcaktuara në këtë ligj.

27. “Ndërmjetësues” është çdo person fizik ose juridik apo partneritet, që ofron shërbime ndërmjetësimi nga territori doganor i Republikës së Shqipërisë në territorin e një vendi të huaj.

28. “Veprimtari ndërmjetësimi” është:

a) negociimi apo organizimi i transaksioneve për blerjen, shitjen ose furnizimin e mallrave të kontrolluara nga një vend i huaj, në cilindo vend tjetër të huaj; ose

b) blerja, shitja apo organizimi i transferimeve të mallrave të kontrolluara që ndodhen në një vend të huaj, drejt një vendi tjetër të huaj.

Në kuptim të këtij ligji, shërbimet ndihmëse nuk do të konsiderohen veprimtari ndërmjetësimi. Shërbimet ndihmëse përfshijnë transportin, shërbimet financiare, sigurimin, risigurimin, si dhe reklamimin e përgjithshëm ose promovimin.

29. “Certifikata ndërkombëtare e importit” është një dokument, lëshuar nga autoriteti i kontrollit shtetëror të shtetit importues, që konfirmon angazhimin e importuesit për të importuar mallra në vendin e tij dhe pas importit të mos i eksportoje apo dërgojë ato në një vend tjetër, pa lejen e organit të sipërpërmendur.

Kjo certifikatë do të konsiderohet e vlefshme kur është paraqitur pranë autoriteteve brenda 6 muajve nga data e lëshimit.

30. “Certifikata e mbërritjes së mallit në destinacion” është dokumenti i lëshuar nga autoriteti i kontrollit shtetëror të shtetit importues dhe konfirmon që marrësi i synuar i mallrave i ka marrë në sasinë dhe llojin e specifikuar në licencë.

Kjo certifikatë do të konsiderohet e vlefshme kur është paraqitur pranë autoriteteve brenda 6 muajve nga data e lëshimit.

31. “Certifikata e përdoruesit të fundit” është dokumenti, në të cilin përdoruesi i fundit përcakton vendin ku do të instalohen (përdoren) mallrat e kontrolluara, qëllimin përfundimtar të përdorimit, si dhe garanton se mallrat nuk do të përdoren për ndonjë qëllim të ndryshëm nga ai i specifikuar në certifikatë, nuk do të transferohen te ndonjë subjekt tjetër në territorin e vendit të destinacionit apo nuk do të rieksporthen pa leje nga vendi eksportues.

Kjo certifikatë do të konsiderohet e vlefshme kur është paraqitur pranë autoriteteve brenda 6 muajve nga data e lëshimit.

Certifikata e përdoruesit të fundit në Republikës e Shqipërisë lëshohet nga Autoriteti i

Kontrollit Shtetëror të Eksporteve, në rastet kur personat fizikë/juridikë kanë si qëllim të pajisen me licencë importi dhe kur kërkohet nga shteti eksportues.

32. “Inspektim” është formë kontrolli, me qëllim verifikimin e respektimit të kërkesave ligjore, sipas këtij ligji, që Autoriteti i Kontrollit Shtetëror të Eksportit kryen në përputhje me këtë ligj dhe ligjin nr. 10 433, datë 16.6.2011, “Për inspektimin në Republikën e Shqipërisë”.

33. “Organ drejtues” është titullari ose çdo organ tjetër i ngritur nga ky ligj apo aktet nënligjore të tij, me qëllim vendimmartjen.

34. “Mallra për mbikëqyrje kibernetike” do të thotë mallra me përdorim të dyfishtë, të projektuara posaçërisht për të mundësuar mbikëqyrjen e fshehtë të individëve nëpërmjet monitorimit, përfutimit, grumbullimit ose analizimit të të dhënave nga sistemet e informacionit dhe të telekomunikacionit.

Neni 3

Fusha e veprimit dhe përjashtimet

(Shtuar shkronja ‘d’ e pikës 2 me Ligjin nr. 89/2024, datë 26.7.2024)

1. Ky ligj rregullon licencimin e veprimtarive që lidhen me transferimin ndërkombëtar të mallrave të kontrolluara, duke përfshirë veprimtaritë ndërmjetësuese, prodhimin, bashkëpunimin shkencor dhe teknik, si dhe ekspozimin e tyre në ekspozita, panaire ndërkombëtare për qëllime reklamimi, testimi, marketingu dhe operacioneve lidhur me to, deri në përdorimin e fundit të tyre apo deri në mbërritjen e tyre te përdoruesi i fundit.

2. Ky ligj nuk zbatohet për:

a) transferimin e mallrave të kontrolluara që kanë lidhje me veprimtaritë e Forcave të Armatosura ose të strukturave të tjera shtetërore të sigurisë të Republikës së Shqipërisë jashtë territorit të saj, të kryera në kuadër të marrëveshjeve ndërkombëtare, të cilat sigurojnë mekanizmin e kontrollit shtetëror të lëvizjes së këtyre mallrave;

b) transferimin ndërkombëtar të mallrave të kontrolluara që kanë lidhje me veprimtarinë e forcave ushtarake të huaja në territorin e Republikës së Shqipërisë, të kryera në kuadër të marrëveshjeve ndërkombëtare, të cilat sigurojnë mekanizmin e kontrollit shtetëror të lëvizjes së këtyre mallrave;

c) transferimet ndërkombëtare të anestezikëve (gazrave anestezike mjekësore), armëve sportive dhe gjahut, të përjashtuara nga lista e mallrave ushtarake, të enëve për gazin, në eksportimin dhe importimin e armatimit personal të personelit të shërbimit ushtarak dhe të organeve të rendit e të sigurisë së brendshme shtetërore, që janë të pajisura me armë, sipas ligjit;

ç) transferimet ndërkombëtare të mallrave të kontrolluara që kanë si qëllim dhënien e asistencës shtetërore ushtarake, në përputhje me kushtet e parashikuara në marrëveshjet e traktatet ndërkombëtare, ku Republika e Shqipërisë bën pjesë, si dhe lëvizjen e mallrave jashtë vendit për dhënien e ndihmës së emergjencës shteteve të huaja, kur kjo vendoset sipas ligjit.

d) transferimet ndërkombëtare të mallrave të kontrolluara, të cilat kryhen sipas udhëzimeve të vendeve/agjencive të NATO-s, për rastet e veçanta të nevojave operacionale të këtyre vendeve.

Neni 4

Parimet e transferimit ndërkombëtar të mallrave të kontrolluara

(Ndryshuar togfjalësh në pikën 2 me ligjin nr. 29/2026, datë 5.3.2026)

Transferimi ndërkombëtar i mallrave të kontrolluara është ndërtuar mbi këto parime:

1. Përparësi ndaj interesit kombëtar – politik, ekonomik dhe ushtarak, mbrojtja e të cilave është

e nevojshme për garantimin e sigurisë kombëtare.

2. Mbrojtje e interesave politikë, ekonomikë dhe sigurisë së vendit.

3. Detyrimi për të respektuar angazhimet ndërkombëtare të ndërmarra nga Republika e Shqipërisë për mospërhapjen e armëve të shkatërrimit në masë, mjetet e përhapjes së tyre dhe për të garantuar kontrollin shtetëror të transferimeve ndërkombëtare të mallrave të projektuara për qëllime ushtarake dhe të artikujve me përdorim të dyfishtë, si edhe për të parandaluar përdorimin e këtyre mallrave për akte terroriste dhe qëllime të tjera të paligjshme.

4. Kryerja e kontrollit të transferimeve ndërkombëtare të këtyre mallrave në masën e kërkuar për të arritur vetëm qëllimin e tij.

5. Harmonizimi i procedurave dhe i rregulloreve të kontrollit shtetëror, i transferimeve ndërkombëtare të këtyre mallrave me normat dhe praktikat ligjore ndërkombëtare.

6. Sigurimi i ndërveprimit me organizatat ndërkombëtare dhe shtetet e huaja në fushën e kontrollit shtetëror të transferimeve ndër-kombëtare, për forcimin e sigurisë dhe të stabilitetit ndërkombëtar, përfshirë këtu mospërhapjen e armëve të shkatërrimit në masë, si dhe të sistemeve të tyre të përhapjes.

Neni 5

Metodat e zbatimit të politikës për kontrollin shtetëror të transferimeve ndërkombëtare

Metodat e zbatimit të politikës për kontrollin shtetëror të transferimeve ndërkombëtare përfshijnë si më poshtë:

a) lëshimin ose refuzimin e licencës apo të certifikatës, duke lejuar kryerjen e transferimeve ndërkombëtare të mallrave të kontrolluara apo lëshimin e autorizimit për kryerjen e negociatave për këto transfertat;

b) pezullimin, shfuqizimin e licencave apo të certifikatave të lëshuara sipas rasteve të specifikuara në këtë ligj;

c) zbatimin e procedurave të kontrollit doganor të transferimeve ndërkombëtare të mallrave të kontrolluara, në përputhje me dispozitat e këtij ligji, si dhe me legjislacionin doganor në fuqi;

ç) zbatimin e sanksioneve për veprimtaritë që shkelin procedurat, të cilat rregullojnë transferimin ndërkombëtar të mallrave, të përcaktuara me këtë ligj dhe aktet e tjera ligjore dhe nënligjore në këtë fushë.

Neni 6

Kompetencat për kontrollin e transferimit ndërkombëtar të mallrave

1. Këshilli i Ministrave zhvillon dhe zbaton politikën e kontrollit për transferimin ndërkombëtar.

2. Politika shtetërore në këtë fushë zbatohet edhe nga Autoriteti i Kontrollit Shtetëror të Eksporteve, ministritë dhe organet e tjera shtetërore që gëzojnë kompetenca për kryerjen e kontroleve. Këto institucione mund të angazhojnë organe të tjera shtetërore për zbatimin e masave të ndërmarra në procesin e kontrollit të eksporteve, përfshirë përfaqësitë diplomatike dhe konsullore të Republikës së Shqipërisë në shtete të tjera, me pëlqimin e institucionit të varësisë.

3. Autoriteti i Kontrollit Shtetëror të Eksporteve, drejtpërsëdrejti ose së bashku me organe të tjera qendrore të ekzekutivit:

a) zhvillon veprimtaritë, si dhe nxit komunikimin me subjektet tregtare dhe industrinë, lidhur

me transferimin ndërkombëtar të mallrave, nëse ato janë në përputhje me këtë ligj;

b) kufizon/ndalon këto veprimtari nëse ato bien në kundërshtim me interesat kombëtarë, me angazhimet ndërkombëtare të ndërmarra nga Republika e Shqipërisë dhe me angazhimet e saj për luftën kundër përhapjes së armëve të shkatërrimit në masë dhe të terrorizmit.

Neni 7

Shkëmbimi i të dhënave në procesin e kontrollit shtetëror të transferimeve ndërkombëtare

(Shtuar pika 1/1 me ligjin nr. 29/2026, datë 5.3.2026)

1. Autoriteti i Kontrollit Shtetëror të Eksporteve ka të drejtë të marrë nga organet e tjera shtetërore, si dhe subjektet e tjera, të përfshira në transferimet ndërkombëtare të mallrave të kontrolluara, të gjitha të dhënat e nevojshme për ushtrimin e funksioneve të tij, në lidhje me kontrollin e transferimit ndërkombëtar. Ai mund t'i përdorë dhe t'i shkëmbejë këto të dhëna me agjenci të tjera homologe ndërkombëtare, vetëm për qëllim të kryerjes së kontrollit ndërkombëtar të transferimit dhe mbrojtjen e interesave kombëtarë.

1/1. Autoriteti i Kontrollit Shtetëror të Eksporteve, në përputhje me rregullat e BE-së dhe legjislacionin në fuqi, mund të shkëmbejë me Komisionin Evropian të dhëna për aktet ligjore kombëtare, autoritetet kompetente, licencat e lëshuara, zbatimin e kritereve të kontrollit, operatorët me program përputhshmërie të brendshëm, masat e zbatuara ndaj shkelësve, si dhe informacion për përdorues fundorë të ndjeshëm e tentativa për shmangie, duke garantuar konfidencialitetin dhe mbrojtjen e të dhënave.

2. Shkëmbimi i informacionit për transferimet ndërkombëtare të mallrave të kontrolluara nuk duhet të jetë në kundërshtim me legjislacionin shqiptar në fuqi dhe interesat kombëtarë.

Neni 8

Mbrojtja e të dhënave të subjekteve të përfshira në transferimet ndërkombëtare

1. Punonjësit e Autoritetit të Kontrollit Shtetëror të Eksporteve, gjatë ushtrimit të veprimtarisë së kontrollit të transferimeve ndër-kombëtare, kanë detyrimin për të mbrojtur të dhënat personale, si dhe ato që lidhen me veprimtarinë tregtare të subjekteve, të dhëna me të cilat njihet gjatë procedurës administrative dhe që mbrohen sipas legjislacionit për mbrojtjen e të dhënave personale.

2. Ky detyrim është gjatë dhe pas përfundimit të detyrës, sipas legjislacionit për mbrojtjen e të dhënave personale.

KREU II

BAZA PËR ORGANIZIMIN DHE ZBATIMIN E KONTROLLIT PËR TRANSFERIMET NDËRKOMBËTARE

Neni 9

Autoriteti shtetëror për kontrollin e transferimeve ndërkombëtare të mallrave ushtarake, artikujve dhe teknologjive me përdorim të dyfishtë

(Ndryshuar paragrafi i parë i pikës 1 me ligjin nr. 89/2024, datë 26.7.2024; shtuar pika 3/1 me ligjin nr. 29/2026, datë 5.3.2026)

1. Në Ministrinë e Mbrojtjes funksionon Autoriteti i Kontrollit Shtetëror të Eksporteve (AKSHE), e cila është struktura shtetërore, përgjegjëse për zbatimin e politikës së kontrollit për transferimet ndërkombëtare të mallrave ushtarake, të artikujve dhe të teknologjive me përdorim të

dyfishtë.

Autoriteti i Kontrollit Shtetëror të Eksporteve është institucion qendror, me statusin e personit juridik, publik, në varësi të ministrit të Mbrojtjes, me seli në Tiranë.

2. Autoriteti i Kontrollit Shtetëror të Eksporteve kryen detyrat si më poshtë:

a) regjistron, sipas rastit, personat fizikë e juridikë, përfshirë edhe autoritetet publike, për kryerjen e veprimtarive me mallra ushtarake, si dhe licencon veprimtaritë e transferimit ndërkombëtar të mallrave të kontrolluara;

b) lëshon, sipas kërkesës së personave të interesuar, licenca, certifikata regjistrimi, certifikata ndërkombëtare të importit, certifikata të shpërndarjes së mallit, si dhe dokumente të tjera të parashikuara në këtë ligj dhe në aktet nënligjore në zbatim të tij;

c) kryen veprimtari kontrolli në të gjitha fazat e licencimit, regjistrimit, njoftimit, livrimit, pas livrimit, si dhe, sipas rastit, në të gjitha fazat e paralicencimit;

ç) bashkërendon sistemin kombëtar të veprimtarive me mallrat e kontrolluara dhe zhvillon veprimtari periodike për informimin dhe përgatitjen e institucioneve të tjera shtetërore dhe të grupeve të interesit të lidhura me kontrollin e veprimtarive me mallra të kontrolluara, si dhe veprimtari të tjera të bashkëpunimit ndër-institucional dhe me publikun.

3. Transferimi ndërkombëtar i mallrave bëhet në bazë të licencave, të autorizimeve dhe të certifikatave të lëshuara nga Autoriteti i Kontrollit Shtetëror të Eksporteve, pas marrjes së mendimit të organeve të tjera shtetërore, sipas fushës së kompetencës.

3/1. Marrëdhëniet e punës së titullarit dhe të punonjësve të AKSHE-së rregullohen në bazë të dispozitave të Kodit të Punës. Emërimi, lirimi ose shkarkimi nga detyra i titullarit të AKSHE-së bëhet nga ministri përgjegjës për mbrojtjen. Emërimi, lirimi ose shkarkimi nga detyra i punonjësve të AKSHE-së bëhen nga titullari.

4. Këshilli i Ministrave miraton me vendim, organizimin, përbërjen, funksionimin dhe statusin e Autoritetit të Kontrollit Shtetëror të Eksporteve dhe afatet, mënyrën dhe procedurën për shkëmbimin e informacionit dhe marrjes së mendimit me institucionet e tjera, të përfshira në transferimet ndërkombëtare të mallrave të kontrolluara.

Neni 10

Lista e mallrave të kontrolluara, objekt i kontrollit të transferimit ndërkombëtar

(Ndryshuar pika 1 me ligjin nr. 89/2024, datë 26.7.2024; ndryshuar togfjalësh në pikën 3 me ligjin nr. 29/2026, datë 5.3.2026)

1. Autoriteti i Kontrollit Shtetëror të Eksporteve, me kontributet e ministrive dhe të organeve të tjera të interesuara, harton dhe propozon pranë ministrit të Mbrojtjes listën e mallrave, objekt i kontrollit shtetëror të transferimeve ndërkombëtare.

Këshilli i Ministrave, me propozimin e ministrit të Mbrojtjes, miraton listën e mallrave ushtarake, të artikujve e të teknologjive me përdorim të dyfishtë në përputhje me listat përkatëse të Bashkimit Evropian.

2. Objekt licencimi dhe kontrolli, sipas dispozitave të këtij ligji, janë dhe mallrat e përshkruara në nenin 11, të cilat nuk janë të listuara në listën e mallrave objekt i kontrollit shtetëror të transferimeve ndërkombëtare.

3. Me vendim të Këshillit të Ministrave, artikujt të cilët nuk janë të përfshirë në pikat 1 dhe 2, të këtij neni, bëhen objekt licencimi dhe kontrolli, në rastet kur transferimi i tyre përputhet me kriteret e përcaktuara në shkronjat “a”, “b”, “c”, “ç”, “d”, “dh” “e” dhe “ë” të nenit 12, të këtij ligji.

Vendimi i Këshillit të Ministrave përcakton periudhën kohore të kontrollit dhe të licencimit të

artikujve të përmendur në paragrafin e parë të kësaj pike.

Neni 11

Mallrat me përdorim të dyfishtë, që nuk janë të listuara, por kontrollohen për arsye të përdorimit përfundimtar të ndaluar

(Ndryshuar me ligjin nr. 29/2026, datë 5.3.2026)

1. Licenca për eksportin e mallrave me përdorim të dyfishtë, që nuk janë të listuara në listën kombëtare, nëse eksportuesi është informuar nga AKSHE-ja se mallrat në fjalë janë ose mund të jenë të destinuara, në tërësi ose pjesërisht, kërkohet në rastet:

a) për përdorim në lidhje me zhvillimin, prodhimin, trajtimin, funksionimin, mirëmbajtjen, ruajtjen, zbulimin, identifikimin ose përhapjen e armëve kimike, biologjike ose bërthamore apo pajisjeve të tjera shpërthyes bërthamore ose për zhvillimin, prodhimin, mirëmbajtjen apo ruajtjen e raketave, që janë në gjendje të mbartin armë të tilla;

b) për një përdorim ushtarak nëse vendi blerës ose vendi i destinacionit është subjekt i një embargoje armësh. Për qëllimet e kësaj pike, “përdorim ushtarak” do të thotë:

i. përfshirja në artikuj ushtarakë, të listuar në listën e mallrave ushtarake;

ii. përdorimi i pajisjeve të prodhimit, testimit ose analizës dhe i komponentëve përkatës për zhvillimin, prodhimin apo mirëmbajtjen e artikujve ushtarakë, të listuar në listën e mallrave ushtarake; ose

iii. përdorimi i çdo produkti të papërfunduar në një fabrikë për prodhimin e artikujve ushtarakë, të listuar në listën e mallrave ushtarake.

c) për përdorim si pjesë ose komponentë të artikujve ushtarakë, të listuar në listën e mallrave ushtarake kombëtare, të cilët janë eksportuar pa licencë ose në shkelje të një licence.

2. Nëse një eksportues është në dijeni që mallrat me përdorim të dyfishtë që ai synon të eksportojë, të cilat nuk janë të listuara, janë të destinuara, në tërësi ose pjesërisht, për ndonjë nga përdorimet e përmendura në pikën 1 të këtij neni, ai duhet të njoftojë AKSHE-në. Ky autoritet kompetent vendos nëse eksporti përkatës do të bëhet subjekt i licencimit.

3. Kërkohet licencë për eksportin e mallrave për mbikëqyrje kibernetike, që nuk janë të listuara në listën e mallrave me përdorim të dyfishtë, nëse eksportuesi është informuar nga AKSHE-ja se mallrat në fjalë janë ose mund të jenë të destinuara, në tërësi ose pjesërisht, për përdorim në lidhje me shtypjen e brendshme dhe/ose kryerjen e shkeljeve serioze të të drejtave të njeriut e të së drejtës ndërkombëtare humanitare.

4. Nëse një eksportues është në dijeni, në përputhje me rezultatet e kujdesit të duhur (*due diligence*) se mallrat për mbikëqyrje kibernetike që ai synon të eksportojë, e që nuk janë të listuara në listën e përditësuar të mallrave ushtarake dhe mallrave e teknologjive me përdorim të dyfishtë, janë të destinuara, në tërësi ose pjesërisht, për ndonjë nga përdorimet e përmendura në pikën 3 të këtij neni, ai duhet të njoftojë AKSHE-në. Ky autoritet vendos nëse eksporti përkatës do të bëhet subjekt i licencimit.

Neni 12

Kriteret për vlerësimin e riskut

(Ndryshuar me ligjin nr. 29/2026, datë 5.3.2026)

1. Transferimi ndërkombëtar i mallrave të kontrolluara kryhet në bazë të licencës së lëshuar nga Autoriteti i Kontrollit Shtetëror të Eksporteve. Në marrjen e vendimit për lëshimin e licencës për transferimin ndërkombëtar të mallrave të kontrolluara, Autoriteti i Kontrollit Shtetëror të

Eksporteve dhe autoritetet e tjera shtetërore, të përfshira në sistemin e kontrollit, vlerësojnë riskun sipas analizës së kriterëve të përcaktuara më poshtë:

a) Licenca refuzohet nëse miratimi bie ndesh me detyrimet ndërkombëtare të mëposhtme:

i. masat kufizuese të miratuara nga organizatat ndërkombëtare ku Republika e Shqipërisë është palë;

ii. traktatet ndërkombëtare për mospërhapjen, çarmatimin dhe detyrimet që rrjedhin nga Traktati i Tregtisë së Armëve;

iii. angazhimet në kuadër të regjimeve të kontrollit të eksporteve, si *Australia Group*, regjimit të kontrollit të teknologjisë së raketave, *Wassenaar*, grupi i furnizuesve bërthamorë dhe regjime të tjera, në të cilat Republika e Shqipërisë është palë.

b) Licenca refuzohet nëse ekziston rrezik i qartë që pajisjet të përdoren për shkelje të të drejtave të njeriut dhe të së drejtës humanitare, si:

i. shtypje të brendshme;

ii. dhunë serioze me bazë gjinore apo ndaj grave/fëmijëve;

iii. shkelje të rënda të së drejtës humanitare ndaj civilëve gjatë konfliktit.

c) Licenca refuzohet nëse pajisjet do të ndikojnë në situatën e brendshme të vendit përfundimtar dhe:

i. do të provokonin apo do të zgjatnin konfliktet e armatosura;

ii. do të përkeqësonin tensionet e brendshme në vendin pritës.

ç) Licenca refuzohet nëse stabiliteti rajonal dhe i paqes rrezikohet, pasi:

i. pajisjet do të përdoren për agresion ndaj një shteti tjetër;

ii. pajisjet do të përdoren për forcim të pretendimeve territoriale me forcë;

iii. pajisjet do të ndikojnë negativisht në stabilitetin rajonal.

d) Gjatë aplikimit, në përputhje me sigurinë kombëtare të Shqipërisë dhe aleatëve, duhet të vlerësohet:

i. rreziku që pajisjet të përdoren kundër interesave të sigurisë së Shqipërisë ose të vendeve partnere;

ii. mundësia e përdorimit të tyre kundër trupave tona ose atyre aleate.

dh) Gjatë aplikimit vlerësohet sjellja ndërkombëtare e vendit pritës, si:

i. qëndrimi ndaj terrorizmit dhe krimit të organizuar;

ii. respektimi i së drejtës ndërkombëtare dhe i angazhimeve për mospërhapje;

iii. nënshkrimi dhe zbatimi i marrëveshjeve ndërkombëtare për çarmatim.

e) Gjatë aplikimit vlerësohet rreziku i devijimit apo i rieksporrit të padëshiruar, duke analizuar:

i. kapacitetin e vendit pritës për kontroll të brendshëm dhe të eksportit;

ii. rrezikun e dërgimit të produkteve të palët e treta të padëshiruara;

iii. mundësinë e përdorimit nga organizata terroriste;

iv. rrezikun e transferimit të teknologjisë.

ë) Gjatë aplikimit vlerësohet përputhshmëria me kapacitetet teknike e ekonomike të vendit pritës, si dhe ndikimi i eksportit në:

i. shpenzimet ushtarake në raport me nevojat sociale;

ii. zhvillimin e qëndrueshëm ekonomik të vendit pritës;

iii. ndikimin në politikat e ndihmës zhvillimore ndërkombëtare dhe Shqipërisë.

2. Ministri i Mbrojtjes miraton udhëzimin për implementimin e kriterëve të përcaktuara në këtë nen për t'u zbatuar nga ana e autoriteteve, të cilat janë të përfshira në procesin e vlerësimit të riskut.

Neni 13

Kritere të përgjithshme për licencimin

(Ndryshuar shkronja "b" dhe shtuar shkronja "b/1" me ligjin nr. 89/2024, datë 26.7.2024)

Subjektet, të cilat kërkojnë të pajisen me licencë për transferimin ndërkombëtar të mallrave të kontrolluara, nuk mund të pajisen me licencë nëse:

a) ndaj subjektit aplikues ka filluar një procedurë penale për shkeljen e dispozitave të këtij ligji apo të akteve nënligjore të tij apo ndaj aplikantit ka filluar një procedim penal lidhur me sigurinë kombëtare;

b) ndaj subjektit aplikues ka filluar procedimi penal ose është dënuar me vendim penal të formës së prerë nga gjykatat e Republikës së Shqipërisë për:

i. veprën penale të prodhimit, mbajtjes, blerjes, transportit apo tregtimit të lëndëve plasëse, të armëve të zjarrit, biologjike, kimike apo bërthamore, si dhe kërkimit shkencor për prodhimin e armëve të shkatërrimit në masë;

ii. shkeljen e dispozitave të këtij ligji;

iii. shkeljen e dispozitave të tjera të legjislacionit në fuqi, që lidhen me rendin kushtetues dhe sigurinë kombëtare.

b/1) ndaj subjektit aplikues ka filluar procedimi penal ose është dënuar me vendim penal të formës së prerë nga gjykatat e një shteti të huaj për:

i. veprën penale të prodhimit, mbajtjes, blerjes, transportit apo tregtimit të lëndëve plasëse, të armëve të zjarrit, biologjike, kimike apo bërthamore, si dhe kërkimit shkencor për prodhimin e armëve të shkatërrimit në masë, sipas parashikimeve të legjislacionit penal në fuqi të shtetit të huaj;

ii. shkeljen e dispozitave të legjislacionit të shtetit të huaj për kontrollin shtetëror mbi transferimin ndërkombëtar të mallrave ushtarake dhe të artikujve e teknologjive me përdorim të dyfishtë;

iii. shkeljen e dispozitave të tjera të legjislacionit në fuqi të shtetit të huaj, që lidhen me rendin kushtetues dhe sigurinë kombëtare.

c) subjekti aplikues rezulton përgjegjës për shkeljen e një embargoje apo sanksioni ndërkombëtar;

ç) dokumentet e dorëzuara nuk përputhen me përdorimin e fundit të mallrave të kontrolluara, të deklaruara në kërkesë;

d) mallrat, për të cilat kërkohet licenca, janë në proces hetimi policor apo në proces gjyqësor.

KREU III

MALLRAT USHTARAKE

Neni 14

Regjistrimi për transferimet ndërkombëtare të mallrave ushtarake

(Ndryshuar paragrafi i dytë i pikës 2, togfjalësh në pikën 3 dhe togfjalësh në shkronjën "dh" të pikës 5 me ligjin nr. 89/2024, datë 26.7.2024)

1. Personat fizikë/juridikë, të cilët paraqesin interes të kryejnë transferime ndërkombëtare të mallrave ushtarake ose të angazhohen në veprimtari ndërmjetësimi, kanë detyrimin e regjistrimit tek

Autoriteti i Kontrollit Shtetëror të Eksporteve kundrejt paraqitjes së dokumentacionit për regjistrim dhe pajisjes me certifikatë regjistrimi.

2. Të dhënat e personave fizikë dhe juridikë, të pajisur me certifikatë regjistrimi, mbahen në regjistrin e Autoritetit të Kontrollit Shtetëror të Eksporteve.

Përcaktimi i formatit të regjistrit, si dhe të dhënat e subjekteve, të cilat duhet të regjistrohen, bëhen me vendim të Këshillit të Ministrave.

3. Autoriteti i Kontrollit Shtetëror të Eksporteve vendos për regjistrim, refuzim të regjistrimit dhe fshirje të subjekteve nga regjistri.

4. Certifikata e regjistrimit është e vlefshme 3 vjet nga data e lëshimit.

5. Pajisja me certifikatë regjistrimi e personit fizik/juridik mund të refuzohet në rast se:

a) subjekti aplikues paraqet dokumentacion të rremë ose të falsifikuar apo në mënyrë të qëllimshme fsheh informacionin ose keqinformon, në lidhje me aplikimin për regjistrim;

b) subjekti aplikues është përgjegjës dhe është dënuar me vendim të formës së prerë për shkeljen e dispozitave në legjislacionin e transferimeve ndërkombëtare të mallrave të kontrolluara, të cilat përbëjnë vepër penale apo dispozitave të tjera lidhur me sigurinë kombëtare;

c) subjekti aplikues është përgjegjës për shkeljen e një embargoje apo sanksioni ndërkombëtar;

ç) kundër subjektit aplikues është ngritur akuzë penale për një shkelje të dispozitave në legjislacionin e transferimeve ndërkombëtare të mallrave të kontrolluara apo ka nisur një procedim civil ose penal lidhur me sigurinë kombëtare;

d) ekzistojnë dyshime të arsyeshme që përfaqësuesi i subjektit apo punonjësit e tij ka hyrë në një marrëveshje apo ka negociuar kontratë me një kompani, individ apo organizata që janë të përfshira në veprimtari të paligjshme që përfshijnë transferimin, përdorimin, prodhimin e mallrave ushtarake apo të armëve të shkatërrimit në masë;

dh) ekzistojnë dyshime të arsyeshme që cenojnë sigurinë kombëtare.

Neni 15

Kontrolli i sigurisë

1. Personi fizik/juridik, që ka paraqitur kërkesë për certifikatë regjistrimi pranë Autoritetit të Kontrollit Shtetëror të Eksporteve, duhet të përmbushë kriteret e posaçme, të rëndësishme për mbrojtjen e sigurisë dhe të interesave të tjerë të Republikës së Shqipërisë.

2. Plotësimi i këtyre kriterëve analizohet gjatë procedurës së kontrollit të kryer nga autoritetet kompetente të sigurisë të Republikës së Shqipërisë, në përputhje me ligjin që rregullon mbrojtjen e të dhënave personale dhe ligjet që rregullojnë fushën e kontrolleve të sigurisë.

3. Kontrollat e përcaktuara në pikën 2, të këtij neni, do të ushtrohen brenda 60 ditëve nga data e paraqitjes së kërkesës tek autoritetet kompetente të sigurisë të Republikës së Shqipërisë.

Neni 16

Paraqitja e një kërkesë të re për regjistrim

Nëse Autoriteti i Kontrollit Shtetëror të Eksporteve refuzon të regjistrojë apo miraton një vendim për çregjistrim ndaj një personi fizik/juridik, ky i fundit mund të paraqesë një kërkesë të re për regjistrim pasi ka eliminuar arsyet, të cilat çuan në refuzimin e kërkesës apo në çregjistrim.

Neni 17

Licencat për transferimin ndërkombëtar të mallrave ushtarake

(Shfuqizuar paragrafi i dytë i pikës 4 me ligjin nr. 89/2024, datë 26.7.2024; me ligjin nr. 29/2026, datë 5.3.2026)

1. Autoriteti i Kontrollit Shtetëror të Eksporteve do të lëshojë vetëm licenca individuale për transferimin ndërkombëtar të mallrave ushtarake, duke aplikuar kriteret e përcaktuara në nenin 12 të këtij ligji.

2. Licenca individuale për transferim ndërkombëtar lëshohet me afat vlefshmërie për një periudhë të përcaktuar kohe, por jo më të gjatë se 2 vjet.

3. Licenca për shërbimet e ndërmjetësimit apo të asistencës teknike është licencë individuale, që i lëshohet një ndërmjetësuesi apo ofruesi të asistencës teknike, për një përdorues të fundit apo marrësi në një vend tjetër dhe mbulon një apo më shumë mallra ushtarake apo shërbime të tjera.

4. Autoriteti i Kontrollit Shtetëror të Eksporteve mund të zgjasë afatin e vlefshmërisë së licencës, sipas kërkesës së subjektit, por jo përtej afatit të vlefshmërisë, të parashikuar në marrëveshjen ekonomike, së cilës i referohet kjo licencë.

Neni 18

Tranziti i mallrave ushtarake

(Ndryshuar pika 2 me ligjin nr. 29/2026, datë 5.3.2026)

1. Tranziti i mallrave ushtarake në rrugë tokësore apo ujore, nga dogana/pika e hyrjes deri në doganë/pikën e daljes, realizohet bazuar te licenca e lëshuar nga Autoriteti i Kontrollit Shtetëror të Eksporteve. Autoriteti i Kontrollit Shtetëror të Eksporteve shqyrton kërkesën për lëshimin e licencës së tranzitit të mallrave ushtarake në rrugë tokësore dhe ujore, duke aplikuar kriteret e përcaktuara në nenin 12 të këtij ligji.

2. Tranzitimi i mallrave ushtarake në rrugë ajrore, i cili përfshin transportimin e mallrave ushtarake me aeroplanë mbi territorin e Republikës së Shqipërisë, me ulje ose jo në territorin e Republikës së Shqipërisë (mbifludurim), realizohet në bazë të lejes me shkrim të lëshuar nga Autoriteti i Aviacionit Civil i Republikës së Shqipërisë, sipas legjislacionit në fuqi për mbifludurimet ajrore.

Neni 19

Masat e sigurisë

1. Gjatë transportit të mallrave ushtarake duhet të merren masat e nevojshme të sigurisë. Transporti i mallrave në rrugë tokësore në territorin e Shqipërisë, kur ato importohen apo eksportohen, bëhet me eskortë të armatosur, sipas dispozitave ligjore në fuqi.

2. Gjatë transportit dhe tranzitimit të mallrave ushtarake merren masat e nevojshme të sigurisë. Transporti dhe tranzitimi i mallrave ushtarake në rrugë tokësore dhe ujore nga dogana/pika hyrëse deri në doganë/pikën e daljes, bëhet me eskortë të armatosur, sipas dispozitave ligjore në fuqi.

Neni 20

Autorizimi për transferimin ndërkombëtar të mallrave ushtarake që lidhen me sekretin shtetëror

1. Subjektet tregtare të përfshira në veprimtari ekonomike me vendet e huaja për transferim

ndërkombëtar të mallrave ushtarake, të klasifikuara si sekret shtetëror, autorizohen nga Këshilli i Ministrave.

2. Këshilli i Ministrave miraton procedurat për lëshimin, shfuqizimin apo pezullimin e licencave për marrjen përsipër të transferimit ndërkombëtar të mallrave që parashikohen nga ky nen, duke marrë në konsideratë kriteret e vlerësimit, të përcaktuara në nenin 12.

KREU IV ARTIKUJT DHE TEKNOLOGJITË ME PËRDORIM TË DYFISHTË

Neni 21

Licencat për transferimin ndërkombëtar të artikujve me përdorim të dyfishtë
(Shfuqizuar paragrafi i tretë i pikës 1 dhe fjalia e dytë e pikës 2 me ligjin nr. 89/2024, datë 26.7.2024; ndryshuar me ligjin nr. 29/2026, datë 5.3.2026)

1. Autoriteti i Kontrollit Shtetëror të Eksporteve lëshon licenca individuale, globale apo të përgjithshme për transferim ndërkombëtar të artikujve me përdorim të dyfishtë, pa cenuar rastet e specifikuar në nenet 22, 23 dhe 24 të këtij ligji, duke aplikuar kriteret e përcaktuara në nenin 12 të këtij ligji.

2. Licencat individuale dhe globale, të vlefshme deri në 2 (dy) vjet, përveç rasteve kur Autoriteti i Kontrollit Shtetëror të Eksporteve vendos ndryshe.

3. Licencat për projekte të mëdha janë të vlefshme për një kohëzgjatje të përcaktuar nga autoriteti kompetent, por jo më shumë se katër vjet, përveç rasteve të justifikuara në mënyrë të arsyeshme, bazuar në kohëzgjatjen e projektit.

4. Aplikuesit duhet t'i paraqesin autoritetit kompetent të gjitha informacionet përkatëse, të nevojshme për aplikimet e tyre, për licenca individuale e globale eksporti, në mënyrë që të sigurojnë informacion të plotë, në veçanti për përdoruesin përfundimtar, vendin e destinacionit dhe përdorimin përfundimtar të artikullit të eksportuar.

5. Licencat individuale të eksportit i nënshtrohen një deklarate për përdorim përfundimtar. Autoriteti kompetent mund të përjashtojë disa aplikime nga detyrimi për të paraqitur një deklaratë për përdorim përfundimtar.

6. Licencat globale të eksportit mund të jenë subjekt i një deklarate për përdorim përfundimtar, nëse është e përshtatshme.

Eksportuesit që përdorin licenca globale të eksportit duhet të zbatojnë një program të përputhshmërisë së brendshme, përveç nëse autoriteti kompetent e konsideron të panevojshëm në bazë të informacionit që ka marrë në shqyrtim gjatë aplikimit për licencë globale, të paraqitur nga aplikuesi.

7. Licencat e përgjithshme duhet:

a) të përcaktojnë se mund të përdoren nga të gjithë personat fizikë ose juridikë, që janë rezidentë apo të vendosur në Republikën e Shqipërisë, nëse plotësojnë kërkesat e këtij ligji;

b) të mos përdoren nëse personi fizik ose juridik është informuar nga autoriteti kompetent se mallrat në fjalë janë ose mund të jenë të destinuara, në tërësi ose pjesërisht, për përdorim në lidhje me zhvillimin, prodhimin, trajtimin, funksionimin, mirëmbajtjen, ruajtjen, zbulimin, identifikimin apo përhapjen e armëve kimike, biologjike ose bërthamore apo pajisjeve të tjera shpërthyes bërthamore ose për zhvillimin, prodhimin, mirëmbajtjen apo ruajtjen e raketave, që janë në gjendje të mbartin armë të tilla; për një përdorim ushtarak, nëse vendi blerës ose vendi i destinacionit është subjekt i një embargoje armësh; për përdorim si pjesë ose komponentë të

artikujve ushtarakë të listuar në listën ushtarake kombëtare, të cilët janë eksportuar pa licencë ose në shkelje të një licence.

8. Autoriteti i Kontrollit Shtetëror të Eksporteve mund ta ndalojë përdorimin e licencave të përgjithshme nëse ka dyshime të arsyeshme për aftësinë e personit fizik ose juridik për të respektuar një licencë të tillë apo ndonjë dispozitë të legjislacionit për kontrollin e eksporteve.

Neni 22

Tranziti i artikujve me përdorim të dyfishtë *(Ndryshuar me ligjin nr. 29/2026, datë 5.3.2026)*

1. Tranzitimi i artikujve dhe i teknologjive me përdorim të dyfishtë nuk është objekt licencimi nga Autoriteti i Kontrollit Shtetëror të Eksporteve, përveç rastit të përcaktuar në pikën 2 të këtij neni.

2. Autoriteti i Kontrollit Shtetëror të Eksporteve, në bashkëpunim me organet e tjera shtetërore, merr vendimin për të ndaluar ose për të licencuar tranzitin e artikujve me përdorim të dyfishtë, të përcaktuar në listën e kontrollit apo në artikujt që nuk bëjnë pjesë në listën e kontrollit, por mund të jenë të destinuar, në tërësi apo pjesërisht, për qëllime të parashikuara në shkronjat “a”, “b” dhe “c” të pikës 1 të nenit 11 të këtij ligji.

3. Autoriteti i Kontrollit Shtetëror të Eksporteve informon autoritetet doganore për vendimin për ndalimin e tranzitit apo licencimin e tij menjëherë pas marrjes së vendimit, të cilit i referohet pika 2 e këtij neni.

4. AKSHE-ja në rastet kur vlerëson se nevojitet një licencë për tranzitin e artikujve me përdorim të dyfishtë, të përcaktuar në listën e kontrollit apo artikujve që nuk bëjnë pjesë në listën e kontrollit, konsideron tranzitues personin fizik ose juridik apo shoqërinë tregtare që ka kontratën me marrësin në vendin e huaj dhe që ka kompetencën për të vendosur për dërgimin e mallrave, që kalojnë nëpër territorin doganor Republikës së Shqipërisë.

5. Nëse personi fizik ose juridik apo shoqëria tregtare nuk është rezidente ose nuk është e vendosur në territorin doganor Republikës së Shqipërisë, autoriteti kompetent mund të vendosë të përcaktojë si tranzitues:

- a) deklaruesin, sipas kuptimit të Kodit Doganor të Republikës së Shqipërisë;
- b) transportuesin, sipas kuptimit të Kodit Doganor të Republikës së Shqipërisë;
- c) personin fizik/individin që transporton mallrat me përdorim të dyfishtë në tranzit, kur ato mallra ndodhen në bagazhin personal të këtij personi.

Neni 23

Shërbimet ndërmjetësuese

1. Ndërmjetësimi i artikujve dhe i teknologjive me përdorim të dyfishtë nuk është objekt licencimi nga Autoriteti i Kontrollit Shtetëror të Eksporteve, përveç rastit të përcaktuar në pikën 2 të këtij neni.

2. Licenca do të kërkohet për shërbime ndërmjetësuese që kanë të bëjnë me artikuj me përdorim të dyfishtë, të përcaktuara në listën e kontrollit apo artikujt që nuk bëjnë pjesë në listën e kontrollit, nëse ndërmjetësuesi është informuar nga Autoriteti i Kontrollit Shtetëror të Eksporteve që artikuj të tillë janë apo mund të jenë të destinuar, në tërësi apo pjesërisht, për përdorime të përcaktuara në nenin 11 të këtij ligji.

3. Nëse ndërmjetësi është në dijeni apo ka baza për të dyshuar se artikuj me përdorim të dyfishtë, të përcaktuara në listën e kontrollit apo artikujt që nuk bëjnë pjesë në listën e kontrollit, në

tërësi apo pjesërisht, janë apo mund të jenë të destinuara për qëllime të përcaktuara në nenin 11, ai njofton Autoritetin e Kontrollit Shtetëror të Eksporteve, i cili përcakton nëse duhet kërkuar licencë për shërbime të tilla ndërmjetësimi.

4. Shërbimet e ndërmjetësimit, të cilit i referohen pikat 2 dhe 3, të këtij neni, mund të realizohen vetëm pasi Autoriteti i Kontrollit Shtetëror të Eksporteve lëshon licencë ndër-mjetësimi apo merr vendimin se një licencë e tillë nuk është e nevojshme.

Neni 24

Asistenca teknike

(Shtuar togfjalësh në pikën 1 dhe pika 5, hequr togfjalësh në pikën 2 me ligjin nr. 29/2026, datë 5.3.2026)

1. Ofrimi i asistencës teknike për artikujt dhe teknologjitë me përdorim të dyfishtë nuk është objekt licencimi nga Autoriteti i Kontrollit Shtetëror të Eksporteve, përveç rastit të përcaktuar në pikën 2 dhe 3 të këtij neni.

2. Licenca do të kërkohet për asistencë teknike që ka të bëjë me artikujt me përdorim të dyfishtë të specifikuar në listën e kontrollit nëse Autoriteti i Kontrollit Shtetëror të Eksporteve e ka informuar ofruesin e asistencës teknike që një asistencë e tillë është ose mund të jetë e destinuar për qëllime të parashikuara në nenin 11 të këtij ligji.

3. Nëse ofruesi i asistencës teknike është në dijeni apo ka baza për të dyshuar se asistenca teknike që ai synon të japë në lidhje me artikujt me përdorim të dyfishtë të përcaktuar në listë është ose mund të jetë e destinuar për qëllimet e përcaktuara në nenin 11, të këtij ligji, ai njofton Autoritetin e Kontrollit Shtetëror të Eksporteve, i cili përcakton nëse për një asistencë të tillë teknike nevojitet licencë.

4. Asistenca teknike e përcaktuar në pikat 2 dhe 3, të këtij neni, mund të jepet vetëm në rast se Autoriteti i Kontrollit Shtetëror të Eksporteve lëshon licencë apo arrin në përfundimin se një licencë e tillë nuk është e nevojshme.

5. Pikat 2 dhe 3 të këtij neni nuk zbatohen nëse asistenca teknike:

a) merr formën e transferimit të informacionit, që është në *domain*-in publik ose kërkim bazik shkencor, sipas kuptimit të shënimit të përgjithshëm për teknologjinë ose shënimit për teknologjinë bërthamore të përcaktuar në listën e mallrave me përdorim të dyfishtë;

b) ofrohet nga autoritetet ose agjencitë e një shteti partner, në kuadrin e detyrave të tyre zyrtare;

c) ofrohet për forcat e armatosura të një shteti partner, në bazë të detyrave që u janë caktuar;

ç) ofrohet për një qëllim që është përfshirë në përjashtimet për artikujt e Regjimit të Kontrollit të Teknologjisë së Raketave;

d) është minimumi i nevojshëm për instalimin, funksionimin, mirëmbajtjen (verifikimin) ose riparimin e atyre mallrave për të cilat është lëshuar një licencë eksporti.

Neni 24/1

Masa kombëtare për arsye të sigurisë publike, politikës së jashtme, sigurisë kombëtare ose të drejtave të njeriut

(Shtuar me ligjin nr. 29/2026, datë 5.3.2026)

1. AKSHE-ja mund të ndalojë ose të vendosë një kërkesë për licencim për eksportin e mallrave me përdorim të dyfishtë, që nuk janë të listuara për arsye të sigurisë publike, politikës së jashtme, sigurisë kombëtare ose të drejtave të njeriut, duke përfshirë parandalimin e akteve

terroriste, përdorime që paraqesin shqetësim në lidhje me sigurinë publike apo për konsiderata që lidhen me të drejtat e njeriut.

2. Në marrjen e këtij vendimi, AKSHE-ja konsideron informacionin dhe/ose kërkesat që vijnë nga institucionet e tjera shtetërore, të përfshira në kontrollin e transferimeve ndërkombëtare të mallrave me përdorim të dyfishtë.

Neni 25

Organizimi i programit të përputhshmërisë së brendshme në subjektet e përfshira në transferimet ndërkombëtare të mallrave të kontrolluara

(Hequr togfjalësh në pikat 1, 2 dhe 4 me ligjin nr. 29/2026, datë 5.3.2026)

1. Autoriteti i Kontrollit Shtetëror të Eksporteve i kërkon aplikantëve për licencën globale krijimin e një programi të detyrueshëm të përputhshmërisë së brendshme (në vijim PPB).

2. Aplikantët për licencën globale, për të cilat Autoriteti i Kontrollit Shtetëror të Eksporteve ka përcaktuar një PPB si të detyrueshëm, aplikojnë tek Autoriteti i Kontrollit Shtetëror të Eksporteve për certifikim të PPB-së.

Për certifikimin e PPB-së, autoriteti vlerëson përmbushjen e kriterëve të mëposhtme:

a) numrin e punonjësve të aplikantit, volumin e tregtisë, natyrën e transaksioneve, profilin e marrësve të ngarkesës dhe përdorimin e fundit të deklaruar të mallrave të kontrolluara, përvojën e vërtetuar në trajtimin dhe menaxhimin e tregtisë së mallrave të kontrolluara; historikun e përputhshmërisë me kontrollin; çdo vendim përkatës gjykate; licencat për transferimin ndërkombëtar të mallrave të kontrolluara dhe stafin drejtues me përvojë;

b) caktimin e një punonjësi nga ana e aplikantit si përgjegjës për menaxhimin e kontrollit për transferimin ndërkombëtar me mallrat e kontrolluara;

c) një angazhim me shkrim nga ana e aplikantit, i nënshkruar nga personi përgjegjës, i përcaktuar në shkronjën “b”, të pikës 2, të këtij neni, që të marrë të gjitha masat e nevojshme për të zbatuar dhe për të vënë në praktikë të gjitha kushtet specifike që kanë të bëjnë me përdorimin e fundit dhe kontrollet e tregtisë për çdo komponent specifik apo produkt të marrë apo të eksportuar;

ç) një angazhim me shkrim nga aplikanti, të nënshkruar nga zyrtari i lartë ligjor, të përcaktuar në shkronjën “b”, të pikës 2, të këtij neni, për t’i dhënë Autoritetit të Kontrollit Shtetëror të Eksporteve informacion të hollësishëm për veprimet e ndërmarra në lidhje me procedurat e aplikantit për kryerjen e verifikimit të figurës së përdoruesve të fundit e të verifikimit dhe ligjshmërisë të përdorimit të fundit të gjitha mallrave të kontrolluara që janë për eksport, import, tranzit, transship, riekспорт, ose me të cilat duhet të ofrohen shërbimet ndërmjetësuese dhe asistencë teknike;

d) konformitetin e PPB-së të zbatuar nga aplikanti me udhëzimet e përcaktuara nga Autoriteti i Kontrollit Shtetëror të Eksporteve.

3. Autoriteti i Kontrollit Shtetëror të Eksporteve asiston personat juridikë dhe fizikë në zhvillimin e PPB-së dhe u siguron atyre informacionin e nevojshëm, si dhe harton e publikon udhëzime për PPB-në.

4. Përfaqësuesit e autorizuar të Autoritetit të Kontrollit Shtetëror të Eksporteve apo të agjencive të tjera të zbatimit të ligjit mund të auditojnë PPB-në. Nëse auditi gjen se PPB-ja nuk përmbush kriteret e identifikuar në këtë nen apo udhëzimet e përcaktuara nga Autoriteti i Kontrollit Shtetëror të Eksporteve, autoriteti merr masat për pezullimin apo shfuqizimin e licencës globale.

KREU V PROCEDURAT E LICENCIMIT

Neni 26

Lëshimi i licencave/autorizimeve apo certifikatave

(Ndryshuar pika 1 me ligjin nr. 90/2020, datë 9.7.2020; ndryshuar fjalë e parë e pikës 1 dhe pika 3 me ligjin nr. 89/2024, datë 26.7.2024)

1. Për lëshimin e licencave/autorizimeve apo të certifikatave në transferimin ndërkombëtar të mallrave, personi fizik ose juridik paraqet kërkesën *online* me dokumentacionin e nevojshëm për shqyrtim dhe vlerësim. Këto dokumente, të cilat i bashkëlidhen kërkesës, përmbajnë të dhëna të sakta për mallrat dhe procedurat e transferimit ndërkombëtar të tyre, si dhe dokumentet e garancisë origjinale për këto transferta.

2. Autoriteti i Kontrollit Shtetëror të Eksporteve, së bashku me organet dhe strukturat e tjera shtetërore, kryen vlerësimin e transferimit ndërkombëtar bazuar në kriteret e vlerësimit të nenit 12 të këtij ligji.

3. Llojet e licencave, certifikatave dhe autorizimeve, dokumentacioni i aplikimit, formatet e kërkesave të aplikimeve, si dhe formatet e licencave, autorizimeve dhe certifikatave përcaktohen me vendim të Këshillit të Ministrave.

Neni 27

Afati kohor për shqyrtimin e një aplikimi për licencë/certifikatë

1. Afati kohor për vlerësimin e një aplikimi përcaktohet në përputhje me kategoritë e mallrave, por nuk duhet të tejkalojë afatet e mëposhtme kohore që nga data e dorëzimit të plotë të dokumentacionit:

- a) 45 ditë për eksportin, riekспортin dhe veprimtarinë ndërmjetësuese të mallrave ushtarake;
- b) 30 ditë për importin e mallrave ushtarake dhe për certifikatën e regjistrimit për mallrat ushtarake;
- c) 30 ditë për eksportin, riekспортin dhe veprimtaritë e ndërmjetësimit të artikujve e teknologjive me përdorim të dyfishtë;
- ç) 20 ditë për importin e artikujve e teknologjive me përdorim të dyfishtë;
- d) 15 ditë për tranzitin/transshipin, asistencën teknike, si dhe importin/eksportin e përkohshëm të mallrave të kontrolluara për arsye ekspozimi, panairë, reklama, teste dhe qëllime të tjera të ngjashme, nëse kjo nuk kërkon transferimin e pronësisë;
- dh) 15 ditë për certifikatat e importit ndërkombëtar, certifikatat e përdoruesit të fundit, certifikatat e mbërritjes së mallit në destinacion.

2. Afatet e përcaktuara në pikën 1, të këtij neni, nuk përfshijnë kohën që nevojitet për të marrë informacion shtesë nga subjektet (persona juridikë ose fizikë) të përfshirë në transferimin ndërkombëtar të mallrave.

3. Nëse informacioni shtesë që i kërkohet aplikantit nuk merret brenda 15 ditëve nga data e kërkesës së autoritetit për informacionin shtesë, aplikimi për licencë/certifikatë apo autorizim konsiderohet i refuzuar dhe nuk është objekt shqyrtimi.

4. Afatet kohore mund të zgjaten deri në 30 ditë, në rastet kur u kërkohen informacione shtesë organeve të tjera shtetërore të përfshira në sistemin e kontrollit të eksporteve.

Neni 28

Ekspertiza teknike gjatë vlerësimit

1. Para fillimit të veprimtarive të transferimeve ndërkombëtare, eksportuesi, importuesi, ndërmjetësuesi, personi përgjegjës për tranzitin dhe ofruesi i asistencës teknike duhet të përcaktojë nëse mallrat në fjalë janë mallra të kontrolluara, sipas dispozitave të këtij ligji dhe akteve nënligjore në zbatim të tij.

2. Autoriteti i Kontrollit Shtetëror të Eksporteve kryen vlerësimin në fushën e kontrollit shtetëror të eksporteve për të zgjidhur çështje lidhur me lëshimin e licencave apo të certifikatave.

3. Autoriteti i Kontrollit Shtetëror të Eksporteve mund të caktojë ekspertë të jashtëm për të zgjidhur çështjet që nuk mund të mbulohen nga institucionet shtetërore.

4. Personat që kanë konflikt interesi nuk mund të emërohen ekspertë. Aplikanti për licencë ose certifikatë do të mbulojë kostot që mund të rezultojnë nga ekspertiza.

5. Ekspertiza nuk do të zgjasë më shumë se 15 ditë nga data e marrjes së të gjitha dokumenteve të nevojshme dhe ky afat do t'u shtohet afateve të përmendura në nenin 27 të këtij ligji.

Neni 29

Refuzimi i një aplikimi

(Shfuqizuar shkronja “ç” e pikës 1 me ligjin nr. 89/2024, datë 26.7.2024; shtuar shkronja “d” në pikën 1 me ligjin nr. 29/2026, datë 5.3.2026)

1. Aplikimi për marrjen e licencave, të autorizimeve apo të certifikatave refuzohet nga Autoriteti i Kontrollit Shtetëror të Eksporteve nëse:

a) institucionet apo organet e tjera qeveritare, që kanë autoritet mbi kontrollet e transferimeve ndërkombëtare, nuk japin pëlqimin e tyre gjatë vlerësimit;

b) ekzistojnë kushtet e parashikuara në nenin 12 të këtij ligji;

c) informacioni i dhënë në kërkesë qëllimisht është jo i plotë apo i pasaktë, apo ato janë formuluar në kundërshtim me kërkesat e parashikuara në këtë ligj;

ç) Shfuqizuar.

d) nga vlerësimi i autoritetit licencues rezulton se pas shqyrtimit paraprak dhe njoftimit për mangësitë e konstatuara, operatori ekonomik:

i. nuk ka paraqitur formularin e plotësuar në të gjitha rubrikat sipas udhëzimeve;

ii. nuk ka paraqitur të gjitha dokumentet e tjera shoqëruese dhe ato nuk janë paraqitur në formën e kërkuar apo përmbajnë korrigjime ose fshirje të pavërtetuara, sipas dispozitave përkatëse, si dhe kur përmbajtja e tyre nuk duket qartë apo është e palexueshme;

iii. nuk përmbush kriteret përkatëse të licencimit/autorizimit/lejimit;

iv. nuk ka kryer pagesën e tarifës së shërbimit.

2. Në rast se aplikimi për marrjen e licencave apo të certifikatës refuzohet, Autoriteti i Kontrollit Shtetëror të Eksporteve njofton aplikantin, si dhe organin shtetëror përgjegjës, sipas pikës “a”, të pikës 1, të këtij neni, brenda 3 ditëve nga marrja e vendimit përkatës, duke dhënë shpjegimet dhe arsyet ku bazohet vendimi i refuzimit.

Neni 30

Pezullimi, ndryshimi, kufizimi i licencave, autorizimeve, certifikatave

(Ndryshuar fjalë në pikën 2 me ligjin nr. 89/2024, datë 26.7.2024; shtuar fjalë në titull, në pikën 1 dhe pika 4 me ligjin nr. 29/2026, datë 5.3.2026)

1. Autoriteti i Kontrollit Shtetëror të Eksporteve pezullon, kufizon për një ose disa produkte licencën, autorizimin, certifikatën e lëshuar nëse:

a) Këshilli i Sigurimit të Kombeve të Bashkuara apo një organizatë tjetër ndërkombëtare, ku Republika e Shqipërisë është anëtare, vendos masa kufizuese kundër vendit për të cilin ishte lëshuar licenca apo nëse ka ndryshime të rrethanave të tjera që mund të ndikojnë në pozicionin e politikës së jashtme apo të interesave të mbrojtjes së vendit;

b) përcakton se një apo më shumë kushte në bazë të cilave është lëshuar licenca nuk ekzistojnë më;

c) në rastet e emergjencës, lidhur me nevojat dhe interesin e sigurisë kombëtare ose për të garantuar përmbushjen e detyrimeve ndër-kombëtare të Republikës së Shqipërisë.

2. Autoriteti i Kontrollit Shtetëror të Eksporteve vendos për pezullimin e përkohshëm të licencës nëse, bazuar tek informacioni që ka vetë apo informacioni i marrë nga autoritete të tjera shtetërore, zbulon që është e nevojshme të bëhen verifikime shtesë të të dhënave.

3. Republika e Shqipërisë nuk mban përgjegjësi ligjore për dëme të mundshme të shkaktuara nga pezullimi i licencës në rastet e përcaktuara në pikat e këtij neni.

4. Nëse subjekti titullar i licencës, i autorizimit, i certifikatës së lëshuar paraqet një kërkesë për ndryshim të një ose të disa elementeve, AKSHE-ja ndryshon licencën, autorizimin, certifikatën e lëshuar, duke ndjekur të njëjtën procedurë si aplikim i ri.

Neni 31

Shfuqizimi i licencave, i autorizimeve, i certifikatave

1. Autoriteti i Kontrollit Shtetëror të Eksporteve miraton një vendim për shfuqizimin e licencës, autorizimit, certifikatës së lëshuar nëse:

a) përcaktohet se pas lëshimit, kriteret ose njëri prej tyre, të vendosura në nenin 12, përputhen;

b) një eksportues, importues, tranzitues, ndërmjetësues apo ofrues i asistencës teknike nuk vepron në përputhje me licencën;

c) përcakton që licenca është dhënë në bazë të informacionit të pasaktë apo të paplotë;

ç) subjekti në fjalë fshihet nga regjistri i subjekteve që merren me transferimin ndërkombëtar të mallrave ushtarake;

d) nëse subjekti i përfshirë në transferimin ndërkombëtar të mallrave falimenton dhe ndaj tij nisin procedurat ligjore përkatëse të falimentimit;

dh) përcaktohet se pas lëshimit, kriteret e shkronjave “b” dhe “c”, të nenit 13, përputhen.

2. Republika e Shqipërisë nuk mban përgjegjësi ligjore për dëme të mundshme të shkaktuara nga shfuqizimi i licencës, i autorizimit, i certifikatës në rastet e përcaktuara në pikat e këtij neni.

Neni 32

Mbajtja e të dhënave

Autoriteti i Kontrollit Shtetëror të Eksporteve ruan në arkivin e tij, për një afat kohor 10 vjet, të gjithë dokumentacionin në lidhje me lëshimin, pezullimin apo shfuqizimin e licencës/ autorizimit/ certifikatës apo refuzimit të aplikimit, si edhe aplikimet dhe dokumentet e tjera të paraqitura nga subjektet përkatëse dhe institucionet shtetërore.

KREU VI KONTROLI SHETETËROR PËR VEPRIMTARITË LIDHUR ME TRANSFERIMET NDËRKOMBËTARE TË MALLRAVE TË KONTROLLUARA

Neni 33

Parimet e nënshkrimit të kontratave me vendet e huaja për transferimet ndërkombëtare të mallrave të kontrolluara

1. Marrëveshjet apo kontratat ekonomike me vendet e huaja për transferimin ndërkombëtar të mallrave të kontrolluara nënshkruhen nga subjekte të përfshira në veprimtari ekonomike me vendet e huaja, në përputhje me legjislacionin e Republikës së Shqipërisë dhe të politikave shtetërore që Këshilli i Ministrave ka vendosur në këtë fushë.

2. Subjektet tregtare vendase, të përfshira në veprimtari ekonomike me jashtë, gjatë procesit të hartimit të këtyre marrëveshjeve apo të kontratave dhe mënyrave të tjera të transferimit ndërkombëtar të mallrave, të parashikuara nga ky ligj, prezumohet se janë në dijeni që mallrat dhe artikujt, objekt i këtyre transferimeve (marrëveshje e kontrata), mund të përdoren nga shtete të tjera ose nga subjekte ekonomike të huaja për krijimin e armëve të dëmtimit në masë dhe mënyrave të përhapjes së tyre.

3. Një subjekt i përfshirë në veprimtari ekonomike me vendet e huaja është i detyruar të refuzojë zbatimin e një marrëveshjeje/kontrate ekonomike me vendet e huaja për transferimin ndërkombëtar të mallrave, nëse ai njoftohet se mallrat do të përdoren për qëllime të tjera nga ato që thuhet në marrëveshje/kontratë ose në dokumente të tjera në lidhje me këtë transferim, ose do të përdoren nga një përdorues i fundit, i ndryshëm nga ai për të cilin është lëshuar licenca.

Neni 34

Kontrolli shtetëror ndaj kryerjes së negociatave për nënshkrimin e një marrëveshjeje ekonomike apo kontrate me vendet e huaja

(Ndryshuar paragrafi i dytë i pikës 2 me ligjin nr. 89/2024, datë 26.7.2024)

1. Subjektet vendase, të përfshira në transferimin ndërkombëtar të mallrave të kontrolluara me vendet/subjektet ose individët e huaj, duhet të marrin një autorizim nga Autoriteti i Kontrollit Shtetëror të Eksporteve për të kryer negociatën për nënshkrimin e një marrëveshjeje/ kontrate ekonomike për eksportin e mallrave të kontrolluara te një vend/subjekt ose tek individë të huaj, të cilët janë nën embargo të pjesshme apo masa shtrënguese.

2. Për të vendosur dhe për të shqyrtuar kërkesat për dhënien e autorizimit për negociatën, të cilave u referohet pika 1, e këtij neni, Autoriteti i Kontrollit Shtetëror të Eksporteve mund të përfshijë organe të tjera shtetërore dhe të marrë mendimet e tyre.

Procedurat dhe kërkesat për marrjen e autorizimit përcaktohen me vendim të Këshillit të Ministrave.

3. Pajisja me autorizim për kryerjen e negociatave nuk e detyron Autoritetin e Kontrollit Shtetëror të Eksporteve që të lëshojë një licencë për eksport.

Neni 35

Kontrolli shtetëror mbi përdorimin e fundit të mallrave

1. Një subjekt i përfshirë në transferimet ndërkombëtare të mallrave të kontrolluara i jep Autoritetit të Kontrollit Shtetëror të Eksporteve informacion gjithëpërfshirës dhe të saktë për përdoruesin e fundit të mallrave të kontrolluara, të cilat janë objekt i transferimit ndërkombëtar, si edhe paraqet certifikatën origjinale për përdorimin e mallrave vetëm sipas qëllimit të përdorimit të deklaruar nga përdoruesi i fundit.

2. Subjektet e përfshira në transferime ndërkombëtare të mallrave marrin masa për të verifikuar mbërritjen e mallrave në destinacion dhe përdoruesin e fundit dhe, në vijim të këtij verifikimi, i japin Autoritetit të Kontrollit Shtetëror të Eksporteve informacionin për kryerjen e verifikimit të nevojshëm.

3. Në përputhje me procedurat e dhëna në këtë nen, Autoriteti i Kontrollit Shtetëror të Eksporteve dhe organet e tjera shtetërore të autorizuara kanë të drejtën të kontrollojnë dhe të inspektojnë ambientet, dokumentet e mbërritjes së mallrave në destinacion dhe përdorimin e mallrave në të gjitha fazat e transferimit ndërkombëtar edhe pas mbërritjes të përdoruesi i fundit vendas.

4. Kontrolli shtetëror për mbajtjen e zotimeve të përdoruesve të fundit vendas për përdorimin e mallrave të importuara në përputhje me qëllimin e deklaruar në licencë kryhet në bazë të analizës së raporteve të paraqitura nga subjekti, që është përdorues i fundit për përdorimin aktual të mallrave, si edhe në bazë të kontroleve të mallrave në mënyrë selektive të kryera nga përdoruesi i fundit.

5. Kontrole të tilla kryhen nga zyrtarë të autorizuar nga Autoriteti i Kontrollit Shtetëror të Eksporteve.

6. Përfaqësuesit e eksportuesve të huaj apo të organeve shtetërore të vendit eksportues, pasi kanë njoftuar Autoritetin e Kontrollit Shtetëror të Eksporteve, mund të marrin pjesë në verifikimin e përdorimit nga përdoruesi i fundit shqiptar të mallrave të importuara më parë nën garancinë shtetërore për përdorimin e tyre, në përputhje me qëllimet e deklaruara, vetëm nëse është përcaktuar në marrëveshjet apo kontratat ekonomike ose në qoftë se kjo e drejtë rrjedh nga detyrimet e përfshira në marrëveshjet ndërkombëtare, në të cilat janë palë vendi eksportues dhe Republika e Shqipërisë.

7. Autoriteti i Kontrollit Shtetëror të Eksporteve mund të kontrollojë me anë të dokumenteve ose nëpërmjet shërbimit diplomatik, kur është e mundur, mbi përdorimin nga ana përdoruesit të fundit të huaj, të mallrave të eksportuara nga Shqipëria në territorin e vendeve të këtyre përdoruesve, nën garancinë shtetërore të përdorimit të tyre në përputhje me qëllimet e deklaruara.

8. Procedurat lidhur me lëshimin e garancive dhe kryerjen e kontrollit shtetëror, në përputhje me detyrimet për përdorimin e fundit të mallit, duke përfshirë lëshimin e certifikatave të importit ndërkombëtar dhe certifikatën e përdoruesit të fundit dhe certifikatat e mbërritjes së mallit në destinacion, përcaktohen me vendim të Këshillit të Ministrave.

Neni 36

Kontrolli doganor

1. Kontrolli doganor i mallrave dhe procedurat e tjera doganore kryhen në bazë të Kodit Doganor të Republikës së Shqipërisë dhe të akteve nënligjore të dala në zbatim të tij, si dhe të këtij ligji.

2. Autoriteti i Kontrollit Shtetëror të Eksporteve duhet t'u japë autoriteteve doganore një

kopje të licencës së lëshuar për transferimin ndërkombëtar të mallrave të kontrolluara, si dhe duhet ta informojë mbi vendimet për pezullime apo shfuqizime të licencave të lëshuara.

3. Në kryerjen e detyrave të përcaktuara në pikën 1, të këtij neni, autoriteti doganor mund të kërkojë asistencën e Autoritetit të Kontrollit Shtetëror të Eksporteve për identifikimin dhe klasifikimin e mallrave të kontrolluara gjatë transferimit ndërkombëtar të tyre dhe për të përcaktuar nëse ato janë në përputhje me licencën e lëshuar ose kanë nevojë për licencë.

4. Nëse autoriteti doganor vërteton se janë shkelur dispozitat e këtij ligji apo të Kodit Doganor apo ka dyshime të arsyetuara se:

- a) informacioni përkatës nuk u mor parasysh kur u lëshua licenca; ose
- b) rrethanat kanë ndryshuar materialisht që nga koha e lëshimit të licencës, pezullon procesin e transferimit ndërkombëtar të mallrave të kontrolluara në territorin e Republikës së Shqipërisë, si dhe kërkon asistencën e Autoritetit të Kontrollit Shtetëror të Eksporteve, sipas përcaktimeve të pikës 3, të këtij neni, në mënyrë që të merret vendimi përfundimtar.

Neni 37

Detyrimet e mbajtjes së të dhënave për subjektet e përfshira në transferimet ndërkombëtare të mallrave të kontrolluara

(Ndryshuar pika 2, hequr fjalë në shkronjën ‘d’ të pikës 3 dhe shfuqizuar shkronja ‘e’ e pikës 3 me ligjin nr. 89/2024, datë 26.7.2024)

1. Subjektet e përfshira në transferimet ndërkombëtare të mallrave të kontrolluara, të cilat janë pajisur me licencë, i paraqesin Autoritetit të Kontrollit Shtetëror të Eksporteve raport me shkrim mbi transferimet aktuale të mallrave të përmendura në këto dokumente dhe për përdorimin e këtyre mallrave sipas qëllimit të deklaruar.

2. Formatet e raportimit, si dhe afatet e koha e paraqitjes së raporteve përcaktohen me vendim të Këshillit të Ministrave.

3. Subjektet që merren me transferimin ndërkombëtar të mallrave ushtarake janë të detyruara të arkivojnë për një kohë prej të paktën 20 vjetësh, pas finalizimit të transferimit ndërkombëtar dhe 10 vjet në rastet e mallrave me përdorim të dyfishtë dokumentacionin e mëposhtëm:

a) përshkrimin teknik të mallrave që mundëson klasifikimin e mallrave në listën kombëtare të mallrave të kontrolluara, bazuar në dispozitat e këtij ligji, nomenklaturën e tarifave doganore, si dhe klasifikimin për mallrat e rrezikshme, sipas Organizatës së Kombeve të Bashkuara, kur është e rastit;

b) sasinë e mallrave në njësi matëse dhe peshë neto të mallrave;

c) emrin dhe adresën e plotë të eksportuesit, importuesit, personit përgjegjës të tranzitit, transshipit, rieksportuesit apo ofruesit të shërbimeve të ndërmjetësimit ose të shërbimeve të asistencës teknike:

i) emrin dhe adresën e plotë të shitësit apo të marrësit të mallrave;

ii) emrin dhe adresën e plotë të përdoruesit të fundit të mallrave;

ç) përshkrimin e shërbimeve të ndërmjetësimit, emrin dhe adresën e plotë të marrësit/marrësve dhe të palëve të tjera (sipas rastit);

d) çdo korrespondencë biznesi, postë elektronike lidhur me eksportet, importet, tranzitet, transshipet, rieksportet dhe ofrimin e shërbimeve të ndërmjetësimit ose asistencës teknike që përfshijnë mallrat e kontrolluara;

dh) porositë, faturat, kontratat, fletëporositë, fletët e shoqërimit, listat e ngarkimit dhe

dokumente të tjera lidhur me eksportin, importin, tranzitin, transshipin, riekспортin dhe ofrimin e shërbimeve të ndërmjetësimit ose të asistencës teknike që përfshijnë mallrat e kontrolluara;

e) Shfuqizuar.

Neni 38

Detyrimet për raportim për subjektet e përfshira në transferimet ndërkombëtare të mallrave të kontrolluara

(Ndryshuar pika 2 me ligjin nr. 89/2024, datë 26.7.2024)

1. Subjektet e përfshira në transferimet e mallrave, që kanë marrë licencë, janë të detyruara që:

a) me kërkesë të një zyrtari të Autoritetit të Kontrollit Shtetëror të Eksporteve apo një organi tjetër mbikëqyrës, të ofrojnë të gjithë dokumentacionin e përcaktuar në nenin 37 të këtij ligji;

b) të respektojnë kushtet mbi të cilat është lëshuar licenca dhe të njoftojnë Autoritetin e Kontrollit Shtetëror të Eksporteve brenda 5 ditëve për çdo ndryshim që ka ndodhur në transferimin ndërkombëtar të mallrave të kontrolluara;

c) të njoftojnë me shkrim Autoritetin e Kontrollit Shtetëror të Eksporteve për çdo ndryshim lidhur me përdoruesin e fundit apo një palë tjetër në një transferim ndërkombëtar të mallrave të kontrolluara, brenda 10 ditëve nga data e ndryshimit;

ç) me kërkesë të Autoritetit të Kontrollit Shtetëror të Eksporteve të sigurojnë konfirmimin e dorëzimit dhe marrjes së mallrave;

d) të kthejnë çdo licencë të përdorur tek Autoriteti i Kontrollit Shtetëror të Eksporteve brenda 7 ditëve nga finalizimi i transaksionit përkatës;

dh) të kthejnë çdo licencë apo certifikatë të papërdorur tek Autoriteti i Kontrollit Shtetëror të Eksporteve brenda 7 ditëve nga skadimi i licencës apo i certifikatës;

e) të respektojnë detyrimet, termat dhe kushtet e tjera që janë pjesë e licencave apo certifikatave të lëshuara nga Autoriteti i Kontrollit Shtetëror të Eksporteve bazuar në këtë ligj.

2. Për ofrimin e informacionit dhe dokumentacionit, sipas pikës 1 të këtij neni, subjektet e përfshira në transferimet e mallrave, që kanë marrë licencë, raportojnë sipas formateve të miratuara.

Formatet e raportimit, si dhe afatet e koha e paraqitjes së raporteve përcaktohen me vendim të Këshillit të Ministrave.

KREU VII

PARANDALIMI I SHKELJEVE DHE PËRGJEGJËSITË PËR KONTROLLIN E EKSPORTEVE

Neni 39

Parandalimi i shkeljeve të legjislacionit dhe përgjegjësia për kontrollin shtetëror të eksporteve

1. Në mënyrë që të parandalojnë shkeljet e legjislacionit në fushën e kontrollit shtetëror të eksporteve, Autoriteti i Kontrollit Shtetëror të Eksporteve dhe organet e tjera shtetërore, brenda përgjegjësi që u njihen me ligj, kanë të drejtë të kontrollojnë dokumentacionin apo të inspektojnë ambientet e subjekteve të përfshira në transferimin ndërkombëtar, për të parandaluar shkelje të legjislacionit në fushën e kontrollit shtetëror të eksporteve, përfshirë edhe kontrollin e mbërritjes në destinacion të mallrave, korrespondencën, dokumentet lidhur me objektivat e deklaruar dhe dokumente të tjera, mbi të cilat bazohet transferimi ndërkombëtar i mallrave.

2. Inspektimi kryhet në përputhje me këtë ligj dhe me ligjin nr. 10 433, datë 16.6.2011, “Për

inspektimin në Republikën e Shqipërisë”.

3. Kur organet e tjera shtetërore vërejnë shkeljet e parashikuara në nenin 41, të këtij ligji, ato njoftojnë menjëherë Autoritetin e Kontrollit Shtetëror të Eksporteve.

4. Kur ka të dhëna të mjaftueshme që tregojnë se po bëhen tentativa për të kryer një vepër penale ose kur ajo është kryer në fakt nga ndonjë subjekt dhe nëse në të janë të përfshira edhe mallra, që janë objekt i kontrollit shtetëror të eksporteve, Autoriteti i Kontrollit Shtetëror të Eksporteve njofton menjëherë autoritetet penale.

Neni 40

Përgjegjësia e personave dhe e subjekteve të përfshira në transferimet ndërkombëtare të mallrave për shkeljet e legjislacionit në fushën e kontrollit shtetëror të eksporteve

Subjektet e përfshira në veprimtari ekonomike me vendet e huaja, personat fizikë, që shkelin legjislacionin në fushën e kontrollit shtetëror të eksporteve, mbajnë përgjegjësi penale, administrative dhe civile, sipas shkeljes së kryer, në përputhje me dispozitat e parashikuara në këtë ligj apo në Kodin Penal të Republikës së Shqipërisë.

Neni 41

Shkeljet e legjislacionit në fushën e kontrollit shtetëror të eksporteve

Shkeljet e mëposhtme, të kryera nga personat fizikë/juridikë, kur nuk përbëjnë vepër penale, sipas Kodit Penal, përbëjnë kundërvajtje administrative:

a) kryerja e transferimit ndërkombëtar të mallrave të kontrolluara në mungesë të licencës apo të certifikatës, sipas procedurave ligjore;

b) kryerja e transferimit ndërkombëtar të mallrave të kontrolluara, në bazë të licencave, të autorizimeve dhe të certifikatave, të lëshuara në bazë të dokumenteve false ose të dokumenteve që përmbajnë informacion të rremë;

c) kryerja e transferimeve ndërkombëtare të mallrave të kontrolluara në kundërshtim me kushtet e parashikuara në licencë ose certifikatë, duke përfshirë ndërhyrjen dhe bërjen e ndryshimeve në marrëveshjen/kontratën ekonomike me vendet e huaja pa dijeninë e Autoritetit të Kontrollit Shtetëror të Eksporteve, si dhe tek emrat dhe kushtet e vendosura nga eksportuesi, importuesi, ndërmjetësi dhe përdoruesi i fundit dhe te përshkrimi i mallrave, zotimet për përdorimin e fundit dhe dhënien e garancive;

ç) ndryshimi i destinacionit të mallrave të kontrolluara gjatë transferimeve ndërkombëtare dhe përdorimi për qëllime të ndryshme apo nga përdorues të fundit të tjerë, të ndryshëm nga ajo që është deklaruar në marrëveshjen/kontratën ekonomike me vendet e huaja dhe në dokumentet e tjera që lidhen me të, në bazë të të cilave është lëshuar licenca, autorizimi dhe certifikata ndërkombëtare e importit;

d) nënshkrimi i marrëveshjeve/kontratave ekonomike për transferimin ndërkombëtar të çfarëdolloj malli ose pjesëmarrja në zbatimin e tyre, në një mënyrë që nuk është përcaktuar nga ky ligj, nëse subjekti i përfshirë në këtë transferim ka marrë informacion se mallrat do të përdoren nga vendi ose subjekti i huaj për krijimin e armëve të shkatërrimit në masë, si dhe për mjetet e përhapjes të tyre;

dh) fshehja e qëllimshme e informacionit, që mund të ndikojë në marrjen e vendimeve për dhënien e licencës, autorizimit dhe certifikatës;

e) shkatërrimi i qëllimshëm i dokumenteve që lidhen me transferimin ndërkombëtar të mallrave të kontrolluara, në bazë të të cilave janë lëshuar licencat, autorizimet apo certifikatat, përpara afatit të parashikuar në nenin 37 të këtij ligji;

ë) mosparaqitja e certifikatës së verifikimit të dorëzimit të lëshuar nga vendi i destinacionit të fundit apo i përdoruesit të fundit që konfirmon marrjen e mallrave të kontrolluara të eksportuara, pas kërkesës së Autoritetit të Kontrollit Shtetëror të Eksporteve;

f) kryerja e negociatave pa autorizimin e Autoritetit të Kontrollit Shtetëror të Eksporteve për nënshkrimin e marrëveshjeve/kontratave ekonomike për eksportin e mallrave të kontrolluara në një shtet/individ apo subjekt nën embargo të pjesshme;

g) krijimi i pengesave në ushtrimin e detyrës zyrtare nga punonjësit e Autoritetit të Kontrollit Shtetëror të Eksporteve dhe organet e tjera shtetërore, që kryejnë kontrollin shtetëror të eksporteve, sipas kompetencave ligjore që u jep ky ligj;

gj) refuzimi i pabazuar për dhënien e informacionit dhe të dokumenteve të kërkuara nga Autoriteti i Kontrollit Shtetëror të Eksporteve ose nga ndonjë organ tjetër, që kryen kontrollin shtetëror të eksporteve brenda kompetencave të tij ligjore, dhe shtrembërimin me dashje apo fshehje të tyre;

h) mosparaqitja ose paraqitja me vonesë e raporteve dhe dokumenteve përkatëse, si dhe mosnjoftimi ose mosinformimi tek Autoriteti i Kontrollit Shtetëror të Eksporteve, sipas dispozitave të këtij ligj dhe akteve nënligjore të tij;

i) mospërputhja me kushtet për mbajtjen e regjistrave, siç parashikon ky ligj dhe aktet nënligjore të tij;

j) mosinformimi me shkrim i Autoritetit të Kontrollit Shtetëror të Eksporteve brenda një afati prej 15 ditësh, për çdo ndryshim lidhur me licencën apo certifikatën e lëshuar;

k) moskthimi i licencës që nuk është zbatuar, në Autoritetin e Kontrollit Shtetëror të Eksporteve, brenda një afati prej 15 ditësh nga data e skadimit të saj.

Neni 42

Gjocat dhe ndëshkimet administrative për shkelje të legjislacionit në fushën e kontrollit të eksporteve

(Ndryshuar fjalia e parë e pikës 2 me ligjin nr. 89/2024, datë 26.7.2024)

1. Autoriteti i Kontrollit Shtetëror të Eksporteve vendos dënime kryesor me gjokë ndaj subjekteve tregtare, të përfshira në transferimet ndërkombëtare të mallrave, si më poshtë:

a) për shkelje të parashikuara nga shkronjat “a”, “b”, “c”, “ç” dhe “d”, të nenit 41, të këtij ligji, nga 500 000 (pesëqind mijë) - 5 000 000 (pesë milionë) lekë;

b) për shkelje të parashikuara nga shkronjat “dh”, “e”, “ë” dhe “f”, të nenit 41, të këtij ligji, nga 200 000 (dyqind mijë) - 2 000 000 (dy milionë) lekë;

c) për shkelje të parashikuara nga shkronjat “g” dhe “gj”, të nenit 41, të këtij ligji, nga 100 000 (njëqind mijë) - 1 000 000 (një milion) lekë;

ç) për shkelje të parashikuara nga shkronjat “h” dhe “i”, të nenit 41, të këtij ligji, nga 50 000 (pesëdhjetë mijë) - 500 000 (pesëqind mijë) lekë;

d) për shkelje të parashikuara nga shkronjat “j” dhe “k”, të nenit 41, të këtij ligji, nga 10 000 (dhjetë mijë) - 20 000 (njëzet mijë) lekë.

2. Subjekteve të pikës 1, përsëritëse të mbi dy herë të shkeljeve të parashikuara në shkronjat “a” dhe “b” të këtij neni, përveç gjokës, u caktohet si masë shtesë ndalimi i kryerjes së transferimit ndërkombëtar të mallrave të kontrolluara. Masa shtesë e përcaktuar vendoset për një periudhë deri në 3 vjet nga data e vendimit përfundimtar.

3. Autoriteti i Kontrollit Shtetëror të Eksporteve, përveç sanksioneve administrative, të parashikuara në nenin 41, të këtij ligji, mund të shfuqizojë licencën apo certifikatën dhënë këtyre subjekteve apo t’i çregjistrojë (në rastin e mallrave ushtarake) kur ata përsërisin shkeljet apo nuk marrin

masa për t'i korrigjuar ato.

4. Në rastet e hetimit penal në lidhje me vepra penale të lidhura me aktivitetin e transferimeve ndërkombëtare apo me sigurinë kombëtare, licenca e lëshuar nga Autoriteti i Kontrollit Shtetëror të Eksporteve mund të pezullohet deri në përfundim të hetimit të çështjes penale.

Neni 43

Ankimi kundër vendimeve të Autoritetit të Kontrollit Shtetëror të Eksporteve

1. Vendimi i marrë nga Autoriteti i Kontrollit Shtetëror të Eksporteve për të vendosur gjoba, pezulluar, revokuar licencën, certifikatën apo autorizimin apo çregjistrim të një subjekti të përfshirë në transferimet ndërkombëtare të mallrave ushtarake mund të ankimohet në përputhje me Kodin e Procedurave Administrative.

2. Shteti shqiptar nuk mban asnjë përgjegjësi ndaj një subjekti për humbjet e shkaktuara për shkak të pezullimit apo të shfuqizimit të licencës, autorizimit, certifikatës dhe garancisë shtetërore, nëse këto veprime janë ndërmarrë për qëllime të mbrojtjes së interesave të sigurisë kombëtare dhe garantimit të përmbushjes së detyrimeve ndërkombëtare të shtetit.

Neni 44

Autoriteti për vendosjen e gjobave për shkeljet e legjislacionit në fushën e transferimeve të mallrave të kontrolluara

(Ndryshuar pikat 4 dhe 5 me ligjin nr. 89/2024, datë 26.7.2024)

1. Gjocat e parashikuara nga neni 42, i këtij ligji, në emër të Autoritetit të Kontrollit Shtetëror të Eksporteve, vendosen nga një komision prej 3 anëtarësh, i cili krijohet dhe drejtohet nga drejtuesi i tij, në përputhje me dispozitat e këtij ligji dhe ligjin për inspektimin.

2. Kur personi i autorizuar i Autoritetit të Kontrollit Shtetëror të Eksporteve vëren njëren nga shkeljet e parashikuara në nenin 41, të këtij ligji, harton një procesverbal, të cilit i bashkëlidhen shpjegimet e drejtuesit të subjektit që ka bërë shkeljen dhe të zyrtarëve të tjerë përgjegjës, si dhe dokumentet e tjera të nevojshme që vërtetojnë shkeljen, të cilat ia paraqet komisionit të autoritetit të përmendur në pikën 1 të këtij neni.

3. Në rast se shkeljet e parashikuara në nenin 41, të këtij ligji, konstatohen nga zyrtari i autorizuar gjatë kryerjes së inspektimit, gjocat e parashikuara në nenin 42, të këtij ligji, vendosen nga vetë zyrtari i autorizuar, në përputhje me këtë ligj dhe me ligjin për inspektimin.

4. Kundër vendimit të komisionit, të marrë sipas pikës 1 këtij neni, bëhet ankim administrativ sipas përcaktimeve të Kodit të Procedurave Administrative.

5. Kundër vendimit të zyrtarit të autorizuar, të marrë sipas pikës 3 të këtij neni, bëhet ankim administrativ sipas përcaktimeve të Kodit të Procedurave Administrative.

6. Gjoca paguhet nga subjekti brenda 30 ditëve. Në rast të mospagesës brenda këtij afati, zbatohet legjislacioni në fuqi për kundërvajtjet administrative.

7. Gjocat e vendosura nga Autoriteti i Kontrollit Shtetëror të Eksporteve derdhen 100 për qind në buxhetin e shtetit.

KREU VIII

MBËSHTETJA FINANCIARE PËR KONTROLLIN SHETETËROR TË EKSPORTEVE

Neni 45

Financimi i veprimtarisë së kontrollit shtetëror të eksporteve

Veprimtaria e institucionit përgjegjës për kontrollin shtetëror të eksporteve financohet nga buxheti i shtetit.

Neni 46

Mbledhja e tarifave për regjistrimin dhe nxjerrjen e dokumenteve

1. Për lëshimin e dokumenteve të regjistrimit të subjekteve të përfshira në transferimin ndërkombëtar të mallrave ushtarake, të licencave, të autorizimit dhe të certifikatave në territorin e Republikës së Shqipërisë, paguhet një tarifë e cila përcaktohet me vendim të Këshillit të Ministrave.

2. Të ardhurat e krijuara nga Autoriteti i Kontrollit Shtetëror të Eksporteve, nga vlera e tarifave, referuar pikës 1, të këtij neni, përdoren në përputhje me vendimin nr. 432, datë 28.6.2006, të Këshillit të Ministrave, “Për krijimin dhe administrimin e të ardhurave që krijojnë institucionet buxhetore”.

KREU IX

DISPOZITA KALIMTARE

DHE TË FUNDIT

Neni 47

Dispozita kalimtare

Për procedurat e licencimit, kontrollit, raportimeve të nisura para hyrjes në fuqi të këtij ligji, zbatohen dispozitat e ligjit nr. 9707, datë 5.4.2007, “Për kontrollin shtetëror të veprimtarisë së import-eksportit të mallrave ushtarake dhe mallrave e teknologjive me përdorim të dyfishtë”.

Dispozita kalimtare dhe të fundit

(Parashikuar në ligjin nr. 89/2024, datë 26.7.2024)

1. Deri në ngritjen e infrastrukturës së dedikuar për paraqitjen e kërkesës *online*, sipas përcaktimeve të pikës 1 të nenit 26, kërkesa për lëshimin e licencave, certifikatave dhe autorizimeve, si dhe dokumentacioni përkatës paraqiten sipas mënyrave e mjeteve ekzistuese.

2. Detyrimet e subjekteve, sipas shkronjave “d” e “dh” të pikës 1 të nenit 38 dhe shkronjës “k” të nenit 41 zbatohen vetëm për rastet e licencave që lëshohen të printuara fizikisht.

3. Të gjitha procedurat e kryera sipas udhëzimeve të vendeve ose agjencive të NATO-s për transferimet ndërkombëtare të mallrave të kontrolluara, me qëllim dhënien e asistencës shtetërore ushtarake konsiderohen në përputhje me regjimin e vendosur për transferimin ndërkombëtar të mallrave të kontrolluara dhe të përcaktuara në nenin 3, të ligjit nr. 46/2018, “Për kontrollin shtetëror të transferimeve ndërkombëtare të mallrave ushtarake dhe të artikujve e teknologjive me përdorim të dyfishtë”, i ndryshuar, sipas dispozitave të këtij ligji.

Neni 48

Aktet nënligjore dhe rregullat e brendshme

(Shtuar pika 3 me ligjin nr. 29/2026, datë 5.3.2026)

1. Këshilli i Ministrave, brenda 6 muajve, miraton aktet e përcaktuara në pikën 4, të nenit 9, në pikën 1, të nenit 10, në pikën 2, të nenit 20, në pikën 8, të nenit 35, dhe në pikën 1, të nenit 46, të këtij ligji.

2. Autoriteti i Kontrollit Shtetëror të Eksporteve miraton aktet nënligjore në zbatim të këtij ligji, të parashikuara në pikën 2, të nenit 14, në pikën 3, të nenit 25, në pikën 3, të nenit 26, në paragrafin 2, të pikës 2, të nenit 34, në pikën 2, të nenit 37, dhe në pikën 2, të nenit 38, të këtij ligji.

3. Ministri i Mbrojtjes miraton aktin nënligjor në zbatim të pikës 2 të nenit 12 të ligjit.

Neni 49 **Shfuqizime**

1. Ligji nr. 9707, datë 5.4.2007, “Për kontrollin shtetëror të veprimtarisë së import-eksportit të mallrave ushtarake dhe mallrave e teknologjive me përdorim të dyfishtë”, shfuqizohet.

2. Aktet nënligjore, të miratuara para hyrjes në fuqi të këtij ligji dhe që nuk bien në kundërshtim me të, do të zbatohen deri në nxjerrjen e akteve nënligjore në zbatim të këtij ligji.

Neni 50 **Hyrja në fuqi**

Ky ligj hyn në fuqi 15 ditë pas botimit në Fletoren Zyrtare.

Miraturar në datën 23.7.2018

Shpallur me dekretin nr. 10861, datë 2.8.2018 të Presidentit të Republikës së Shqipërisë, Ilir Meta.